

Nyuuth tēnē Joon

Wet nom

Athör kēnē anyuth tēnē Joon cī gōt wāār guum kōc cī gam, rin cī kek la gam tēnē Jethu Krītho ke ye Beny. Wetdīt wic raan gāt athöör, ee wet bīi kōc bī ye kueen rieel puōth bik la nōth, bik rēer ke nōth akōöl käreec ke gum.

Abanđit athör kēnē yic atō kajuēc wat kekōōth kāk cī nyuōōth, ku kāk cī tīj cī ke kieet wēl yiic, kāk ye kōc theer wāār cī gam ke deet yiic. Ku alēukē bik rēer ke cī moony tēnē kōc kōk ēbēn. Athör kēnē acī guiir ke cīt dhöl waak, yen aye ke wēl lueel ku ben ke ber yiic dhöl juāac cīi thōj, cīt te cī ke wat kōōth thīn.

Na cōk alōn cī tāk ye rōm kek tēcīt te ye ke deet yiic thīn athöör yic. Ke wet ciel yic ala gei, dhēl Krītho Bānyda, yen Nhialic. Abī kōc aterde tiaam alanden akōl ciēen agut Beny jakreec. Akōl le tiām kēnē thāap, ke kōc cī gam aabī dōoc. Ku riōp ke piny ē yam, nhial ē yam.

Kāk tō thīn

Wet Nom 1:1-8

Jōk ē nyuuth ku athör cī gāt akuut kōc kadhorou 1:9-3:22

Athöör kek adōk kadhorou 4:1-8:1

Kej kadhorou 8:2-11:19

Jōrac ku lääi karou 12:1-13:18

Anyuth kōk juēc 14:1-15:8

Riāäk puōu ē Nhialic 16:1-21

Riāj Babilon ku tiām cī kōc ater Nhialic tiaam 17:1-20:10

Lunđit 20:11-15

Nhial ku piny ku Jeruthalem ē yam 21:1-22:5

Thök ē Wēl 22:6-21

Wēl tuej

1 ¹ A athör kēnē yic Joon acī kāj gāt piny, kāk cī Jethu Krītho nyuōōth. Acī Nhialic looi bī kākā tīj, rin bī kacke cōl anic kāk bī rōt looi nīn thiōkkā yiic. Raan cī lōc ku dōc acā atunyden nhial tuōc aluōnyde bī lek athōn kēnē. ² Joon acī kāk cī tīj ēbēn lueel. Yeen acā athōn bō tēnē Nhialic gāt piny, ku kāk cī Jethu Krītho nyuōōth ye.

³ Raan mit puōu ē raan bā athōn kēnē kuen kōc cī gam, athōn bō tēnē Nhialic. Ku kōc mit puōth, aa kōc bī ye piņ ku thekkē kē ye lueel, rin te bī Nhialic kākā cōl aloi rōt acī thiōk.

Muōth tēnē akuut kōc cī gam kadhorou

⁴ Ee yen Joon, yen aget tēnē akuut kōc cī gam ē beei Athia yiic.

Yen arōōk lōn bī wek nhier ku dōōr yōk tēnē Nhialic. Yen tō thīn emēn, ku areer thīn tetheeryōn, ku yen bī ben. Wek aabī nhier ku dōōr yōk tēnē wēi kadhorou ē thōny Nhialic nom, ⁵ ku tēnē Jethu Krītho, raan yen nyooth yic rin Nhialic. Yen ē ye raan tuej cī rot jōt ē thou yic, ee yen amac bānyņaknhīim ēbēn pinyhom aya.

Yeen anhiar yo, ku ajuerden cī yen rot juaar bī thou, ēcī yen yo wēer bei adumuōōmkua yiic, ⁶ ku looi yo buk aa kōc luui Nhialicde ku ye Wun, diik ku riel aa kākke akōlriēc ēbēn. Yenakan.

⁷ Tieņkē, yen abō pial yiic. Abī raan ēbēn tīj, agut kōc wāār nāk ye. Kōc pinyhom ēbēn aabī dhiau ē rienke. Kēya abi ciet kēnē! Yenakan.

⁸ Aye Beny Nhialic lueel ēlā, “Ee yen jōk ē cōk ku yen thök ē kāj.” Nhialic Madhōl tō thīn emēn, ku areer tetheeryōn, ku yen bī ben.

Tiņ Raan cī lōc ku dōc

⁹ Ee yen Joon menhkui dun, week ēbēn wek kōc tuōc athōr kēnē, ke ya ye raan cī wet Jethu gam cimēndun. Ku rin ē kēnē yok aa tōk, ku yen agum aya cimēndun. Ku yen abī rēer ē bāāny Nhialic yic kek we aya, ku yen alir puōu cimēndun. Yen a ya mac golgol Patmoth nhom, golgol reer Adekdiet yic, rin cī yen wet Nhialic, ku yiny Jethu nyuōōth. ¹⁰ Wēi Nhialic aake cī ben yaguōp akōl Nhialic. Guō rōldit la wic cīt kaņ piņ ke jam yakōu ciēēn. ¹¹ Ku lueel, “Gāt kē ye tiņ athōōr yic ēbēn, ku tuōc athōōr tēnē akuut kōc cī gam ē beei kadhorou yiic, Epethuth, Thimirna, Pergamum, Thiatira Thardīth, Piladelpia ku Lodikia.”

¹² Guō rot wel ba raan jam tiņ, nawēn wel yanhom, ke ya tiņ kāk ye many adōk took kenhīim cī looi milāņ tōc kadhorou, ke kāac. ¹³ Ku kēcīt manh raan ke kāac keciel yiic, ku a cien alanh dīit ye paat kōc kōōth ē piny kuaar yet yecōk, kek karkar dīit cī looi milāņ tōc yepēem. ¹⁴ Nhimken ē nhom aake yer ka cīt gai tueny deņ, ku adep nyin cimēn mac. ¹⁵ Ku cōk ala diardiar cīt ban cī coth kōu, ku akōk yic apei cīt lōōr puōc kōoc. ¹⁶ Yen wēn amuk kuel kadhorou ciinden cuēc, ku amuk pal dīit moth ē thok kedhie bō bei yethok. Ku dēp nyin cīt ruel akōl ciel yic.

¹⁷ Wēn tiņ yen ye, ke ya wīeek piny yecōk ciet ya cī thou. Go ya thany nhom ciinden cuēc ku lueel, “Duk riōc. Ee yen jōk ē cōk ku yen thōk ē kāņ. ¹⁸ Yen ē pīr, yen a ya cī thou ku ēmēn yen acī ben pīr akōlriēēc ēbēn. Yen amuk wēnh riēt yōōt ē thou ku yōōt pīr aya.

¹⁹ “Yin adhil kākā gōt ēbēn, kāk ye tiņ ēmēn ku kāk bī rōt looi akōldā. ²⁰ Ku kuel kadhorou, ca tiņ kōņdien cuēc, wetden yic, atuuc nhial kadhorou, tēnē akuut kōc cī gam kadhorou. Ku kāk kāac kāk ye many adōk took kenhīim akuut kōc cī gam kadhorou.”

Athōn tēnē kōc cī gam Epethuth

2 ¹ “Yin awiēc ba athōōr gāt akut kōc cī gam gen Epethuth, raan muk kuel kadhorou ciinden cuēc ku cieth kam kāņ kadhorou ye many adōk took kenhīim, aye lueel tēnē we ēlā.

² Aņiec yen te cī wek pīr thīn ē pierdun yic. Aņiec yen teril cī wek luui thīn ke we kōc cī gam, ku te cī wek kārīl yiic gōōk thīn. Aņiec lōn cīi wek ye bī lēu bāk kōc ē luui kārec puōl bik ke ya looi welōm. Wek aacī kōc ye lueel lōn ye kek atuuc Jethu them, ku acāk ben yōk lōn ye kek alueth ē path. ³ Aņiec lōn guum wek rienkie we lir puōth, ku wek kēc puōth bath. ⁴ Ku kē maan tēnē we akīn, wek acīi yen nhīar ēmēn cimēn theer wāār puōc wek gam. ⁵ Kēya, muōkkē wenhīim yen te cāk dōōt luoi kārec yiic! Pālkē luoi kārec, ku pieerkē cīt tetheer wāār puōc wek wet ca lek we gam. Na lak tueņ ke we lui kārec, ke yen abī la tēnē we, ku la we tem awuōc bī yen kēdun ye wek many adōk took yenhom nyaai teden keec yen thīn. ⁶ Ku wek ya leec rin meen wek kāk ye kōc Nikolauth looi cimēn meen yen ke aya.

⁷ “Na lakkē yīth, ke we piņ kē ye Wēi Nhialic lek akuut kōc cī gam. Yen abī kōc cī jōņrac tiaam gām yic bik mīth tim ē pīr cam, tim reer gōr ē Nhialic yic!

Athōn tēnē kōc cī gam Thimirna

⁸ “Yin awiēc ba athōōr gāt tēnē akut kōc cī gam gen Thimirna ēlā, kēnē ē wet raan kāņ cōl ajōk rōt ku cōl ke aa thōk, raan cī thou ku ben pīr aya, aye lueel,

⁹ Yen aņic kārīl rēer wek thīn, aņiec lōn wek aa nōņ ku wek aņieek wepuōth. Yen aņic kārec ye lueel wegup kōc ye lueel ka kōc cī Nhialic lōc, ku ē lueth ē path. Ku keek aa kōc akut jōņrac. ¹⁰ Duōkkē riōc gum bī wek gum ēmēn. Pieņkē! Jōņrac acī thiōk kek te bī yen kōc kōk kamkun mac rin bī yen gamdun them. Wek abī rēer ater yic nīn kathīāār ku duōkkē puōth go bath wetdie yic cōk alōn nek we, rin wek aaba gām pīr akōlriēēc ēbēn ke ye yen ariōp.

¹¹ “Na lakkē yīth, ke we piņ kē ye Wēi Nhialic lek akuut kōc cī gam. Ku raan bī jōņrac tiaam, acīn kēreec bī ye yōk alanayōn ē thon yic rou.

Athōn tēnē kōc cī gam Pergamum

¹² “Yin awiēc bā athōōr gāt tēnē akut kōc cī gam gen Pergamum, kēnē athōn bō tēnē raan muk pal cī ther thok kedhie.

¹³ Yen aņic te rēer wek thīn gen mec jōņrac. Wek aa kōc wetdie ē cōk, ku wek akēc puōth dhōr gamdun yic tēnē ya. Wek akēc gamdun waar yic, agut wāār cōk Antipāth raan ye nyuōōth kāk ye looi yiic lōn ee yen raandie nōk gendun ē teen, gen mec jōņrac. ¹⁴ Ku ala kāthīi maan tēnē we, kōc kōk weyiic aa piōōc

Balaam buōth yic, Balaam wäär nyuth Balak te bī yen kōc Itharel cōl aloi adumuōm thīn. Ku lēu bik riñ cuet, riñ lān cī nāk jak, ku loikē kāk bal. ¹⁵ Ku kēlā aya, kōc kōk weyiic aa piōoc kōc Nikolauth buōth yic. ¹⁶ Pālkē luoi kārec! Na cāk pāl ke ʔen abī ben kek ē pal ben bei ʔathok bī ʔen kōckā tem awuōc. ¹⁷ Na lakkē yīth, ke we piñ kē ye Wēi Nhialic lek akuut kōc cī gam. ʔen abī raan cī jōṅrac tiaam gām abañ ayum nhial cī Nhialic tō̄u, ku gām alel ʔer, alel cī rin yam cīn raan ṅic ke gōt yekōu, na cie raan cī gām ye.

Athōn tēnē kōc cī gam Thiatira

¹⁸ “ʔin awiēc ba athōor gāt akut kōc cī gam gen Thiatira ēlā, kākā aa wēl bō tēnē Wēn Nhialic raan nyin dēp cīt mac, ku le cōk diardiar cīt ban cī coth kōu.

¹⁹ ʔen aṅic kāk yakē ke looi. Aṅiec lōn wek aanhiar rōt kamkun, ku wek aa muk gamdun. Aṅiec yen te cī wek rōt kuony thīn kamkun, ku te guum wek thīn, aṅiec lōn wek aaloi kājuēc wār kāk wäär tueṅ.

²⁰ Ku ʔen ala kēthiin maan tēnē we, wek acī tik puōl tiṅ cōl Jedhebel ye lueel ke raan kāk Nhialic tiṅ. Ku piōocde ē kackie thel luoi kāk bal yiic, ku camkē miēth cī juer jak cī kieet. ²¹ Aca lek bī yepuōu dhuōk ciēen adumuōmke yiic, ku acī jai bī yepuōu dhuōk ciēen. ²² Ku kēya, aba cōl atuany ku kōc kāk bal looi kek ye aabī gum apei te cīi kek kepuōth dhuk ciēen, ku pālkē kārec yekē ke looi kek ye. ²³ Kōc cī piōocde gam aa ba nōk, ku aabī akuut kōc cī gam ēbēn jal ṅic lōn ʔen ē raan ē kē tō raan puōu ēbēn ṅic, ku ṅiec kuat kē wic. Ku kuat raan ēbēn aba tem awuōc cīt kē cī looi.

²⁴ “Ku ēmēn aba lek kōc abek kamkun gen Thiatira, kōc kēc piōoc rēc ē tiṅ buōth yic, ku wek aakēc luui kē ye kacke cōl, ‘Aye kē cī thiaan apei cī jōṅrac moony.’ Aya lek we lōn wek acā bī mēc det ril yic. ²⁵ Wek aadhil la tueṅ ke we gam wetdie, ʔet te bī ʔen ben. ²⁶ ʔen abī kōc cī jōṅrac tiaam, ku lek tueṅ ke loi wetdie ʔet te bī ʔen dhuk gām riel bik pinynhom mac. ²⁷ Aabī pinynhom mac riel ke cīn aṅuān, ku abīk thuōr piny ku thorkē ke cīmēn tōny cī looi ē tiōp. ²⁸ Rielden abī thōṅ kek riel ca yōk tēnē Wā. Aaba gām ciēer aya, ciēer bī ke nyuōth tiām cī kek tiam. ²⁹ Na lakkē yīth, ke we piñ kē cī Wēi Nhialic lek akuut kōc cī gam.

Athōn tēnē kōc cī gam gen Thardith

3 ¹ “ʔin awiēc ba athōor gāt tēnē akut kōc cī gam gen Thardith ēlā, raan mac wēi kadhorou thōny Nhialic nhom, ku amuk kuēl kadhorou, ee we tuōc wet kēnē,

ʔen aṅic kuat kāk cāk looi ēbēn, aṅiec lōn ye wek ye tak lōn piūr wek cōk alōn cī wek thou. ² Aca yōk lōn pierdun ke we ye kōc cī gam acīi thōṅ kek te cī Nhialic ye guīer thīn. Kēya, pāäckē nin yic, ku dhuōkkē riel yam ē pīr kōc cī gam yic ke we kēc guō thou ē gīm. ³ Muōkkē yīth wäär cī piōoc tēnē we nhīim, ku thekkē ke. Pālkē luoi kārec ku dhuōkkē wepuōth ciēen adumuōmkun yiic. Pāäckē ba rot cīi kuēl wegup cīet ʔa ye cuār ē ben baai wakōu. Ku acīi bī ṅic ba ben nen. ⁴ Ku na cōk a kēya ke wek aṅot we la kōc lik Thardith, kōc kēc luui kārec. Keek aabī cath kek ʔa ke cieṅ aleth ʔer, rin aala yic bik looi kēya. ⁵ Raan bī riel jōṅrac tiaam cīmēn ē kek abā aleth ʔer cieṅ. Ku rienke acā bī nyaai athōr pīr yic. Te le ʔen kōc Wā nhom kek atuucken nhial ye luō̄i, aba lueel yenhom lōn ṅic ʔen ē raan kēnē. ⁶ Na lakkē yīth, ke we piñ kē ye Wēi Nhialic lek akuut kōc cī gam.

Athōn tēnē kōc cī gam gen Piladelpia

⁷ “ʔin awiēc ba athōor gāt tēnē akut kōc cī gam gen Piladelpia ēlā, raan la guōp Wēi Nhialic ku yic, yen la riel bī kōc Nhialic mac nyin benyṅaknhom Debit. Ku te ṅeeny yen ʔōt thok ka cīn raan lēu ye bī thiōōk. Ku te thiōōk yen ʔōt thok ka cīn raan lēu ye bī ṅaany.

⁸ ʔen aṅic kāk yakē ke looi, aṅiec lōn le wek riel koor, ku wek aa ṅot we buōth piōocdie yic ku thekkē ʔa. Tieṅkē ʔōt aca ṅaany thok wenhīim, ku acīn raan lēu ye bī ben thiōōk thok. ⁹ Tieṅkē, ʔen abī kōc kek kōc jōṅrac, alueth ye lueel lōn ye kek kōc cī Nhialic lōc looi bik tō wecōk, ku bik deet yic lōn nhīer ʔen we.

¹⁰ Wek acī gum riel ē thok cīt tewäär cī ʔen we lek thīn. Kēya, wek aba kony aya te le nin thōk, nin bī ʔen kōc pīr ēbēn them pinynhom. ¹¹ ʔen abō ēmēn, muōkkē kē cāk yōk apath, bī cien raan rum kēpeth cāk yōk rin cī wek tiam. ¹² Raan bī riel jōṅrac gōōk aba looi ke ye thel ril ʔōn ye Nhialic door thīn, Nhialic yen ya luō̄i. Raan kēnē acīi bī kaṅ jāl ē tēen. Aba gāt kōu rin Nhialicdie ku rin Jeruthalem yam, yen rin gen ē Nhialicdie bī ben bei tēnē Nhialic nhial. Aba gōt kōu aya rinkien yam.

¹³ “Na lakkē yīth, ke we piñ kē ye Wēi Nhialic lek akuut kōc cī gam.

2:14Kn 22:5, 7; 31:16; L.rou 23:4; Kn 25:1-3 2:17B.bei 16:14-15; 16:33-34; Jn 6:48-50; Ith 62:2; 65:15

2:201Bṅ 16:31; 2Bṅ 9:22, 30 2:23Wk 7:9; Jer 17:10; Wk 62:12 2:26-27Wk 2:8-9

3:3Mt 24:43-44; Lk 12:39-40; Ny 16:15 3:5B.bei 32:32-33; Wk 69:28; Ny 20:12; Mt 10:32; Lk 12:8

3:7Ith 22:22; Jop 12:14 3:9Ith 49:23; 60:14; 43:4 3:12Ny 21:2; Ith 62:2; 65:15

Athön tēnē kōc cī gam gen Lodikia

¹⁴“Yīn awiēc ba athöör gät tēnē akut kōc cī gam gen Lodikia älā, raan yen Yenakan. Yen cī yiny Nhialic nyuōōth ē cōk, ku ē yen acī kēriēc ēbēn cī Nhialic jōok cōk cak, aye lueel älā,

¹⁵Yen aņic kāk cāk looi ēbēn, wek aa kēc yen jai, tedē wek aa kēc yen lor piāthkun ēbēn, na we ye rōt mat abak, diet apath Ƴapuōu. ¹⁶Ku rin kēc piāthkun rōt mat abak, yen abī jai ē we. ¹⁷Yīin aye lueel, ‘Yen ajak! Acīn kē ŋōņ Ƴa, acīn kē ben wic.’ Ku acīi ŋic yen te ye yīn laaņ aņāāņ thīn. Yīn aņāņ ē cath ke cīn kē ceņ, ku yīn ē cōr. ¹⁸Rin ē kēnē, yīn alek bī ya mīlāņ tōc la wic yen Ƴoc tēnē Ƴa, bī yīn jieek yōk thīn. Yīn adhil aleth Ƴer Ƴōc aya ba ke tāau yīkōu, ku bī kēwāār yīn cath yīkōu path ke cīn alanh cīeņ liu ba guōp cī ben riōc ē kōc, ku Ƴoc kē ye kōc kenyin tōc ba tāau yīnyin rin bī yīn daai. ¹⁹Kōc nhiaar aa ya māt ku tem ke awuōc, kēya rēerkē apath ku pālke luoi kārēc bāk puōth miēt. ²⁰Pālke weyīth piny, yen ē Ƴarōl tuņ Ƴōndun thok. Na le raan piņ Ƴarōl ku ŋeeny Ƴōt thok ke yen ala thīn, ku laar ku määth kek ye. ²¹Yen abī raan cī riel jōņrac gōok gām yic bī nyuc ē thōoc nhom Ƴalōōm. Kēnē abī ciet ēmēn cī Ƴer riel jōņrac gōok ku nyuōc ē thōoc nhom Wā lōōm.

²²“Na lakkē yīth, ke we piņ kē ye Wēi Nhialic lek akuut kōc cī gam.”

Thōny pan Nhialic

4¹Tewēn cī yen kākā ēbēn tiņ, ke Ƴa ben nyuōōth aya, ku tieņ Ƴōt thok ke ŋaany pan Nhialic. Ku kē ca piņ tueņ ē raan jam tēnē Ƴa rōldīt la wic cīt kaņ ke ye lueel, “Bāār nhial ten ku yīn aba cōl atīņ kāk bī rōt looi ye kēnē cōk.” ²Nyin yic ē teen ke Wēi Nhialic la Ƴaguōp. Ku tieņ thōoc ē teen pan Nhialic ku raan ke cī nyuc yenhom. ³Raan cī nyuc ē thōoc adēp nyin bilbil cīt kuur Ƴer dhēņ, ku kēdiīt cīt mīīt ke cī thōoc gōōl piny, ke dep birbir. ⁴Ku alōņthīn kēwēn cī thōoc gōōl piny yic, thōc kōk kathiārou ku ŋuan aake kāac thīn, ku kōcdīt kathiārou ku ŋuan aake cī nyuc kenhīim. Ku keek aake cīeņ aleth Ƴer ku ajōm ē bāny kenhīim. ⁵Thōoc abier ku meer nhial cīet ye deņ. Thōoc nhom tueņ mec adōk kadhorou aake dep thīn, kākā aake ye Wēi Nhialic kadhorou. ⁶Aya, thōoc nhom tueņ, ala ke diīt cīt baar ē wār cī looi macar dep la bilbil. Ku thōoc kōu ten ku ten, lāai kaņuan la nyin juēc kenhīim ku kekōōth aya aake tō thīn. ⁷Lān tueņ acīt kōōr, ku lān ye kek rou acīt muōr ē weņ, ku lān ye kek diāk acīt nhom raan, ku lān ye kek ŋuan acīt lienh tōņ pār nhial. ⁸Keek ēbēn ŋek ē la wuōk kadātem la nyin juēc keyiic ku kekōth aƳeer. Aa waak ket akōl ku weer älā, “Aleec, aleec, aleec tēnē Beny Nhialic Madhōl tō thīn ēmēn ku areer tetheeryōn, ku yen bī ben.”

⁹Lāai kaņuan aa diet ket tēnē raan cī nyuc thōoc nhom, pīr akōlriēc ēbēn. Aa ket waak leec kek ye lōn ril yen ku le diikdīt. Te looi kek ye kēya, ¹⁰kōcdīt kathiārou ku ŋuan aa kenhīol guōt piny raan cī nyuc ē thōoc nhom cōk, ku dorkē raan pīr akōlriēc ēbēn. Ku cuetkē ajōmken piny ē thōoc nhom, ku luelkē,

¹¹“Yīn ala yic, buk yīin a door Bānyda Nhialic, ku gemku yīin aleec rin le yīn riel ku diik. Rin yīn acī kēriēc ēbēn cak, ku rienku yen acī yīn kēriēc ēbēn cak ku pīirkē.”

Athöör ku Manh Amääl

5¹Ku tieņ athöör ke muk raan cī nyuc thōoc nhom ciinden cuēc. Athöör acī gōt yic ku yekōu aya, ku acī nuet thok theny kadhorou. ²Ku tieņ atuny Nhialic ril apei, ke thiēc rōldīt, “Yeņa la yic bī thaany kuem athöör thok ku liep athöör yic?” ³Ku acīn raan pan Nhialic, nadē ke ye pinyinhom ku piiny tiōp yic la riel bī athöör pet yic ku kuen. ⁴Guō dhiau apei rin cīn yen raan cī yōk ke la cōk bī looi kēya. ⁵Go raan tōk kōcdīt lek Ƴa, “Pāl dhiēu! Tiņ kōōr, raan kuat Juda wundīt Debit wāār ē benyņaknhom yen acī jōņrac tiaam, kēya yen alēu ye bī theny kadhorou kuem ku pet athöör yic.”

⁶Ku tieņ Manh Amääl ē thōn ke kāac ē thōny benyņaknhom cīel yic. Yeen acī lāai pīr kaņuan ku kōcdīt gōōm piny. Ku Manh Amääl aca tiņ ke ciet cī nōk. Ku ala tuņ kadhorou ku nyin kadhorou kek Wēi Nhialic kadhorou cī tuōc pinyinhom ēbēn. ⁷Go Manh Amääl la ku lōōm athōr tō cīin cuēc tēnē ye cī nyuc thōoc nhom. ⁸Tewēn cī yen ye lōōm, ke lāai pīr kaņuan ku kōcdīt kathiārou ku ŋuan, gut kenhīol piny yenhom, ku kōcdīt aake muk thoom ku aduuk cī looi mīlōōņ tōc cī thiāņ adōņ ŋīr, yen tō nyin rōōk kōc ē Nhialic luōōi. ⁹Ku ketkē waak ē yam älā,

“Yin ala yic ba athöör lööm ku kuem theny yethok.
 Rin cī kōc yī nōk ku riemdu yen acī yin kōc pinyhom,
 dhiēth ku wuōt ku thok ēbēn Ƴōc bīk aa kōc ē Nhialic ēmēn.
¹⁰ Yin acī keek cōl aaye kōc Nhialicda luōōi.
 Ku aabī pinyhom mac.”

¹¹ Ku ben daai, ku pieŋ rōl atuuc nhial juēc apeidit cīi kuen ke kääc ke cī thöoc gööm piny, ku lääi pīr kaŋuan ku kōcdit, ¹² aake kēt waak röldit apei,

“Manh Amääl wäär cī nōk yen ala yic.
 Adhil leec rin rielden tō kek yeen,
 ku jieek ku ŋiny kāŋ, ku diik, aa dhil atheekdit apei yök thīn.”

¹³ Ku pieŋ kuat kē pīr ēbēn tō pan Nhialic ku pinyhom, ku piiny tiōp yic ku wēr yiic ēbēn ke kēt ēlä,
 “Tēnē yeen cī nyuc thöoc nhom ku tēnē Manh Amääl,
 bī aleec ku atheek ku diik ku riel aa kākke akōlriēec ēbēn!”

¹⁴ Ku gem lääi pīr kaŋuan, “Yenakan.” Ku gut kōcdit kenhiol piny ku dorkē.

Theny

6 ¹ Guō Manh Amääl tiŋ ke kuem thaany tueŋ kam theny kadhorou, ku pieŋ lān tōk kam lääi kaŋuan pīr ke lueel röldit apei cīt mār ē deŋ, “Bäär!” ² Ku tieŋ piny, go ya mathiāŋ Ƴer yen tieŋ, ku raan cath ē ye amuk dhaŋ ke wieth, ku gem ajōm ē beny bī tāau yenhom. Ku jiēl bī la pinyhom, cīt keny cī tōŋ dhoŋ ku cop kōc ater.

³ Ku kuem Manh Amääl thaany ē rou thok, ku pieŋ lān pīr ē rou ke jam röldit ēlä, “Bäär!” ⁴ Ku bö mathiāŋ thith bei tēwēn. Ku raan cath ē yeen acī gām riel bī kōc cōl aathār pinyhom, ku bī kōc rōt nōk ē rōt. Ku gem paldit ye kōc thōr.

⁵ Ku ben Manh Amääl thaany ē diäk kuem, ku pieŋ rōl ē diäk lān pīr ke lueel, “Bäär!” Ku tieŋ piny, go ya mathiāŋ col yen tieŋ ku raan cath ē ye amuk wēnh ye kāŋ them yecin. ⁶ Guō kē cīt rōl raan piŋ ke jam kam lääi kaŋuan pīr yiic ku lueel, “Aduŋ abik yen ariōp akāl tōk, ku aduuk kadiäk ayiēer kek ariōp akāl tōk. Ku duōkkē tiim ye miök yök thīn ku tiim ye cam rēc.”

⁷ Ku ben Manh Amääl thaany ē ŋuan kuem thok, ku pieŋ rōl lān ē ŋuan pīr ku lueel, “Bäär!” ⁸ Ku tieŋ mathiāŋ cīn kīt la gei, ku raan cath ē ye ala rin, “Thou,” Ku rin kōk cōl, “Piny ē Thou,” Ke buōoth cōk ke cīi yiic mec. Keek aake cī gām riel bīk tēcīt abaŋ ŋuan kōc pinyhom yiic nōk ē tōŋ ku cōk, ku tuaany, ku lääi roor.

⁹ Ku ben Manh Amääl thaany ē dhiēc kuem thok, ku tieŋ wēi kōc wäär cī nōk ariäk cōk rin cī kek wet Nhialic gam puōu ēbēn, ku yekē lueel. ¹⁰ Go wēi kiu röldit apei ku luelkē, “Beny yin ala cōk ku yin ē yic! Ye nen bī yen rot jāl looi ba kōc pinyhom tem awuōc rin cī kek Ƴo nōk?” ¹¹ Go ŋek kamken aa gām alanh Ƴer, ku lēk ke bīk tiit tethin-nyōot Ƴet te bī akuēn kōc lui ke ke, ku miethakēn kek ke bī nōk ēbēn cīmēnden, jāl tuōōm.

¹² Ku tieŋ Manh Amääl ke kuem thaany ē dātem thok. Ku ya ayieekyieek pinydit tet yen loi rot, ku loi akōl rot bī cuol cīt alanh col, ku wel pēei yenyin bī ya malual cīt riem. ¹³ Ku löōny kuel piny nhial cīmēn ŋam cī luok ye yom teŋ piny te yieek yen tim. ¹⁴ Ku dol nhial rot ciet ye athöör ku mer, ku nyēei kuōr ku golgol tō wīr rōt ē nyienken yiic. ¹⁵ Go bānyŋaknhīim ē pinyhom, ku bāny mec, ku bāny apuruuk ku ajeiek, kōc thiek yiic ku aloony, ku kōc cie aloony them bīk thiaan ē kuōr yiic, tedē ke ye kuōr nhīim. ¹⁶ Ku yekē cōot kuōr yiic ku aleel yiic, ku luelkē, “Aa wek kuōrkā kuōmkē Ƴonhīim bī raan rēer ē thöoc nhom Ƴo cīi tiŋ. Ku Manh Amääl acīi bī lēu bī Ƴo ben tem awuōc. ¹⁷ Ee yic akōldit bī Nhialic ku Manh Amääl raan ēbēn tem awuōc acī ben, ku acīn raan bī awuōc kēnē göök?”

Kōc 144,000 Itharel

7 ¹ Ku ben atuuc nhial kaŋuan tiŋ ke kääc guōk ē piny kaŋuan yiic, ke ke jāc yom ē ben guōk kaŋuan yiic nhom, bī cīen yom ben buok ē pinyhom, tedē wēr yiic, tedē kuat tim nhom. ² Ku tieŋ atuny det ke bö bei te ye akōl nyin ben thīn, ke muk thaany Nhialic pīr, ku cōl atuny kēnē röldit atuuc nhial kaŋuan wäär cī gām riel bīk pinyhom agut cī wēr. ³ Ku lueel, “Duōkkē piny ku wēr ku tiim rēc, Ƴet te bī Ƴok kōc cī Nhialic gam

5:9Wk 33:3; 98:1; Ith 42:10 5:10B.bei 19:6; Ny 1:6 5:11Dan 7:10 6:2Dhāk 1:8; 6:3, 6 6:4Dhāk 1:8; 6:2
 6:5Dhāk 6:2, 6 6:8Edhe 14:21 6:12Ny 11:13; 16:18; Ith 13:10; Juel 2:10, 31; 3:15; Mt 24:29; Mk 13:24-25; Lk 21:25
 6:13-14Ith 34:4 6:14Ny 16:20 6:15Ith 2:19, 21 6:16Ƴoth 10:8; Lk 23:30 6:17Juel 2:11; Mal 3:2
 7:1Jer 49:36; Dan 7:2; Dhāk 6:5

ēbēn yiēk n̄h̄im k̄it ken̄h̄im tueṅ.”⁴ Ku lēk raandā ṅen, l̄on akuēn k̄oc la n̄h̄im thaany ē Nhialic k̄oc Itharel yiic aa k̄oc 144,000 ē kuat thiāār ku rou Itharel yiic,^{5–8} tim thiāār ku rou kuat Itharel t̄ok yic, Juda, Ruben, Gat, Acer, Naptalī, Manathe, Thimaan, Lebī, Ithakar, Dhebulun, Jothep, ku Benjamin.

K̄oc juēc k̄āac pan Nhialic

⁹ Ku diēl ṅanyin piny, ke ṅa t̄iṅ k̄oc juēc c̄i l̄eu b̄i ke kueen. Keek akuut kam kuat dhiēth, ku wuōt, ku thok k̄oc reer pinyhom ēbēn. Ku keek aake k̄āac ē th̄ōoc n̄hom tueṅ ku j̄ol a Manh Amāäl, ku aake cieṅ aleth ṅer ku keek ēbēn aake muk wuōk ageṅ kecin.¹⁰ Ku k̄iukē r̄öldit apei ku luelkē,

“Nhialicdan reer th̄ōoc n̄hom ku Manh Amāäl kek aa ṅook luōk.”

¹¹ Ku atuuc ēbēn aake k̄āac ke c̄i th̄ōoc, ku k̄ocdit, ku j̄ol aa l̄āai p̄ir kaṅuan gööm, ku gutkē kenhiol piny ē th̄ōoc n̄hom tueṅ ku dorkē Nhialic,¹² ku luelkē,

“Yenakan! B̄i aleec, ku diik, ku ṅ̄iny k̄aṅ ku gam riel,

ku atheek, ku rieldit apei ku lec aa k̄äk Nhialicda ak̄ölr̄iēc ēbēn. Yenakan.”

¹³ Go raan t̄ok kam k̄ocdit wēn ṅa thiēc ku luel, “Ye ṅ̄iṅa k̄oc cieṅ aleth ṅerkä, ku b̄ik tenen?”

¹⁴ Guō dhuk n̄hom, “Aa kuōc ke, beny. Ee ṅ̄in aṅic ke.” Go luel, “Kekkä aa k̄oc c̄i t̄ēek k̄aril yiic ku guumkē. Aacā alāthken l̄ok riem Manh Amāäl b̄i ke looi b̄ik ṅer.¹⁵ Ku ē yen aye kek k̄ōoc th̄ony Nhialic n̄hom ku yekē luōi ak̄ol ku w̄er luanḡe, ku yen c̄i nyuc ē th̄ōoc n̄hom ab̄i ke aa kony ē r̄erde th̄in.¹⁶ Keek aac̄i rou ku c̄ok b̄i ben n̄ök ac̄in, tedē ke ya ak̄ol tuc yen ben ke nyop gup,¹⁷ rin Manh Amāäl yen reer th̄ōoc yic ciel ab̄i ya abiṅden. Ku ab̄i ke la deek nȳin p̄iu ē p̄ir, ku aab̄i Nhialic weec nȳin ē p̄iu w̄ār dhieeu kek.”

Thaany ē dhorou

8¹ Nawēn ṅany Manh Amāäl thaany ē dhorou thok, kam wēn ke piny la bit tethin-nyōot koor.² Ku tieṅ atuuc kadhorou ke k̄āac Nhialic n̄hom ku ṅek ke c̄i yiēk kaṅ.

³ Ku b̄o atuny det, ku keec ariäk l̄ōöm ke muk kē ye adōṅ ṅ̄ir took th̄in c̄i looi m̄ilāṅ t̄oc. Ku yeen ēc̄i ḡam ad̄ok juēc ṅ̄ir apei, b̄i ke juar kek r̄ōök k̄oc ē Nhialic ariäk c̄i looi m̄ilāṅ t̄oc n̄hom, reer ē th̄ōoc l̄ōöm.⁴ Ku la tol adōṅ ṅ̄ir c̄i took nhial, kek r̄ōök k̄oc ē Nhialic muk atuny nhial k̄āac Nhialic n̄hom.⁵ Go atuny kē ye ad̄ok took th̄in l̄ōöm, ku muōc yic many reer ariäk n̄hom ku c̄uet piny. Ku piṅ kē c̄it m̄är ē deṅ ku bir, ku loi ayieekyieek rot.

Keṅ

⁶ Go atuuc kadhorou la keṅ kadhorou r̄öt guiir b̄ik ke kooth.⁷ Go atuny tueṅ kaṅde kooth yic, go ya ḡoi ku many c̄i liäp kek riem kek l̄ōöny pinyhom. Go mac t̄ōöṅ ē diäk tiim ku wal c̄i cil pinyhom nyop.

⁸ Go atuny ē rou kaṅde kooth yic, go ya k̄ēd̄it c̄it kuur ē mac yen p̄ir rot adekdieet yic. Go t̄ōöṅ ē diäk rot waar b̄i ya riem.⁹ Go t̄ōöṅ ē diäk k̄äk p̄ir adekdieet thou, ku rec t̄ōöṅ ē diäk riēth.

¹⁰ Ku koth atuny ē diäk kaṅde. Go ya kueldit apei dep yen l̄ōöny t̄ōöṅ ē diäk w̄er ku nȳin p̄iu ye dek yiic.¹¹ Ku rin ē kuel k̄enē ac̄ol k̄ēkec ṅ̄er. Go p̄iu r̄öt wel b̄ik kec, ku k̄oc juēc ke c̄i dek th̄in aac̄i ben thou rin c̄i p̄iu kec.

¹² Go atuny ē ṅuan kaṅde kooth. Go t̄ōöṅ ē diäk ak̄ol ku p̄ei ku kuel rac ab̄i t̄ōöṅ ē diäk ruelden yic liu. Ku c̄in ruel t̄ōöṅ ē diäk ak̄ol ku w̄er.

¹³ Ku jal jat ṅanyin, ke ye acu yen tieṅ ke p̄är nhial, ku pieṅ ke c̄öt r̄öldit apei ku luel, “Ye k̄ereec ē d̄ä! Ye k̄ereec ē d̄ä tēnē k̄oc ē pinyhom rin aab̄i k̄arec yök, te le atuuc k̄ök kadiäk keṅ kooth yiic.”

9¹ Ku koth atuny ē dhiēc kaṅde. Guō kuel c̄i l̄ōöny ē pinyhom t̄iṅ, ku yeen ac̄i ḡam wēnh ē riēt b̄i yen tethuth mec yic apei ṅaany n̄hom.² Go tethuth mec yic apei ṅaany n̄hom. Go toldit apei ben bei tethuth, tol c̄it tol manydit dep apei, ku pat tol ak̄ol nyin ku nhial ku looi piny b̄i cuōl.³ Ku ye k̄oryōm yen b̄o bei tol yic b̄i la pinyhom, ku gem riel c̄it riel ē kith.⁴ Go l̄ek ke b̄ik wal kek tiim ku k̄äkkök cil pinyhom c̄i rec, ku ye k̄oc c̄in gup k̄in Nhialic ken̄h̄im tueṅ kepec kek r̄eckē ke.⁵ Keek aake c̄i Nhialic puōl b̄ik k̄oc aa yiēk terem apei tēn pei kadhiēc ku c̄ik k̄oc n̄äk. Ku ar̄eem yekē yiēk k̄oc ac̄it arem dhie c̄i kieth raan moc.⁶ Ye peikā kadhiēc yiic ab̄ik w̄ic b̄ik thou, ku thuōu ab̄i mec ke ke.

⁷ K̄oryōm juēcä aake c̄it m̄ithiōṅ c̄i guiir b̄ik la t̄oṅ yic. Ku aake ceṅ kacit aj̄ōm c̄i looi m̄ilāṅ t̄oc ken̄h̄im, ku aake c̄it nȳin k̄oc.⁸ Ku nh̄im t̄o ken̄h̄im aa b̄är c̄imēn nh̄im ē diāār, ku aala thook lec c̄it lec ē k̄ōör.⁹ Ku

7:3Edhe 9:4, 6 7:14Dan 12:1; Mt 24:21; Mk 13:19 7:16Ith 49:10 7:17Wk 23:1; Edhe 34:23; Wk 23:2; Ith 49:10; 25:8
8:3Amo 9:1; B.bei 30:1, 3 8:5Leb 16:12; Edhe 10:2; B.bei 19:16; Ny 11:19; 16:18 8:7B.bei 9:23-25; Edhe 38:22
8:10Ith 14:12 8:11Jer 9:15 8:12Ith 13:10; Edhe 32:7; Juel 2:10, 31; 3:15 9:2Cäk 19:28 9:3B.bei 10:12-15
9:4Edhe 9:4 9:6Jop 3:21; Jer 8:3 9:7Juel 2:4 9:8Juel 1:6

aala pem kē cīt wēnh dhie ye kōc kepuōth gēēn tōj yic. Ku duōt ye wuōkken looi te peer kek, acīt duōt riēth dhie ye mīthiōōj juēc thel looi, te le kek tōj yic. ¹⁰ Ku yālken aa cīt yāl ē kith, ku kē cīt kek yāl kākā yēn ale kek riel bīk kōc ya gām te rem ye peikā kadhiēc yiic. ¹¹ Ku keek aala benyñaknhom mac ke, yēn atuny tethuth mec yic, ku rienke acōl riāāk, tedē ka col raan ē kāñ rac.

¹² Kēreēc tueñ acī thōk. Ku ye cōk ciēēn kāreēc kōk karou thiek apei aabō.

¹³ Ku koth atuny ē dātem kañde, guō rōl piñ ke bō kam guōk kañuan yiic ariāk cī looi mīlāñ tōc kāāc ē Nhialic nhom. ¹⁴ Ku lueel rōl tēnē atuny ē dātem wēn muk kañ yecin ēlā, “Lony atuuc kañuan wāār cī duōt piny wārdīt Yuparet yic.” ¹⁵ Go atuny ē dātem atuuckā kañuan jal lony bīk tōōj ē diāk ē kōc pinyhom nōk. Aake cī Nhialic tāu akōldeen alanden. ¹⁶ Go lek yēn lōn apuruuk aa timtim buōt karou. ¹⁷ Ku tieñ mīthiōōj ku kōc cath ē ke nyuōth yic. Ku kōckā aala pem kēcīt wēnh dhie ye kōc kepuōth gēēn tōj yic, ku wēthkā aa thith cīmēn mac, ku aa mīñōk ku mikēth aya. Ku nhūim mīthiōōj aa thōj ke nhūim kōr. Ku mac ku tol ku kēdet mac col adēp ē ben bei kethook. ¹⁸ Kākā kadiāk, tol, ku mac ku ban mac col adēp ben bei mīthiōōj thook, acī tōōj ē diāk kōc pinyhom ben nōk. ¹⁹ Rin riel mīthiōōj atō kethook ku keyāl aya, rin yālken aake cīt kāpieny kenhūim ye kek kōc gām yōntōōk.

²⁰ Abek kōc ē pinyhom kēc kājuēc rec kōc nōkkā ke nōk, aake kēc luoi kāreēc puōl acīn, luoi ye kek jakreēc door, jak cī kieēt ē wēth ku aleel ku tiim cie daai, ku cik ye piñ ku cik ye cath. ²¹ Kōckā aakēc luoi kāreēc puōl, cīt nāāk ē rōt, luoi kāk jakreēc, ku luoi ē bal, wīny diāār ku cuēēr.

Atuuc ē Nhialic ku athōr koor

10 ¹ Ku ben atuny dēt ril apei tiñ ke bō bei pan Nhialic ke bō ē pinyhom. Ee cī luāt kum ku miit yēnhom nhial, ku adēp nyin cīmēn akōl, ku dierke kecīt liēm ē mac. ² Atuny kēnē amuk athōr thiin koor ñaany yic yecin, ku cōkden cuēc ēcī tāau adekdiēet nhom, ku cōkden ē cam pinyhom, ³ ku cōōt rōldīt cīt dhiēn kōōr. Nawēn cī cōōt ke kēcīt mār ē deñ gam yerōl arak dhorou nhial. ⁴ Wēn jīeem kacīt mār deñ kadhorou, ku wēn duer kāk cik lueel gāt piny, ke ya piñ rōl pan Nhialic ke lueel, “Duk kāk cī kacīt mār deñ kadhorou lueel lēk kōc kōk, ku duk ke get piny.”

⁵ Go atuny wāār ca tiñ ke kāāc adekdiēet nhom ku pinyhom ayeer, ciinden cuēc jat nhial. ⁶ Ku kuēēñ rin Nhialic cie thou, ku yēn cī nhial ku piny ku wēr, ku kāk tō keyiic ēbēn cak ku lueel, “Nhialic acī bī tūt apei ēmēn, bī kē cī guir cī loi tecīt te bī yēn rot luōi thiin! ⁷ Ku te le atuny ē dhorou kañde kooth, ke Nhialic abī kēden cī thiaan thāap cīmēn wāār cī yēn ye lek aluōnyke, kōc kākke tiñ.”

⁸ Go rōl wēn ca piñ ke jam nhial yēn yōōk, “Lōr lōm athōr koor ñaany yic muk atuny kāāc adekdiēet nhom ku pinyhom ayeer.”

⁹ Guō la tēnē atuny nhial ku thiēēc bā gām athōōr. Go gām yēn ku lueel, “Lōm ku cam. Abī miet yīthok ciet ye kiēc ku abī rot la wel bī wac yīyāc.” ¹⁰ Guō athōōr lōōm ku cam, go miet yathok ciet ye kiēc. Nawēn yet yāyāc ke wel rot bī wac bī ciet cuēei. ¹¹ Ku lēk ya ēlā, “Yīn adhīl kē cī Nhialic guir tēnē kōc ē pinyhom ēbēn nyuōth ēmēn, kōc jam ē thok juāāc ku bānyñaknhūim.”

Kōc wet Nhialic lek kōc

11 ¹ Go yēn gām wai, wai ē duer ciet tim dhie ye kāñ them, ku lēk ya, “Lōr them luāñ Nhialic ku ariāk tō thīn, ku kuen kōc ē rōōk thīn tēnē ya. ² Ku duk kal yic tō luak kōu them rin lōj kēnē acī gām kōc kēc wetdie gam. Ku keek aabī gēndie kuany kōu ke rec kāñ pei kathiārñuan ku rou. ³ Ku yēn abī kackie karou tuōōc bik wet ē yic la lueel. Aabā aleth col, aleth ē leēñ cien, ku aabī wetdie la lek kōc ē nīn tim ku buōt karou ku thiārdātem yiic.”

⁴ Kōckā karou wet Nhialic nyuōth, kek aa tiim karou ye miethken looi ē miōk, ku kāk ye mec adōk karou took kenhūim ē kōōc Nhialic nhom beny pinyhom. ⁵ Na le raan them ye bī kōckā karou yiēc terem, ke mac abō bei kethook ku nyuōp kōc ater ēbēn. Kēya raan wic ye bī looi kēya abī Nhialic nōk. ⁶ Aacī Nhialic gām riel bī kek deñ pēēn bī cī tueny nīn bī kek wetde nyuōth. Aacī gām riel aya bī kek piū waar bīk aa riēm, ku colkē kuat kērac ēbēn abō pinyhom. Kēnē alēukē bik aa looi akōlakōl tecīt te wickē ye.

⁷ Nawēn cī kōckā karou wet jal nyuōth ēbēn, ke lān roor rac apei bō bei tethuth mec yic, aabī thōr ke ke ku aabī lān ke nōk, ⁸ ku guāpken aabī cuat ē gēk yic gēndīt wāār cī kek beny ē kōckā karou piāāt thīn tim cī rīū kōu. Gen kēnē acīk gām rin cīt rin pan Thodom ku Ijip. ⁹ Kuat dhiēth, wuōt ku thok pinyhom ēbēn aabī guāpken aa tiñ piiny ē gēk yic nīn kadiāk ku abak, ku acīn raan bī puōl bī ke thiōk. ¹⁰ Kōc pinyhom ēbēn

9:9Juel 2:5 9:13B.bei 30:1-3 9:20Wk 115:4-7, 135:15-17; Dan 5:23

10:5-7B.bei 20:11; L.rou 32:40; Dan 12:7; Amo 3:7 10:8-10Edhe 2:8-3:3 11:1Edhe 40:3; Dhāk 2:1-2 11:2Lk 21:24

11:4Dhāk 4:3, 11-14 11:61Bñ 17:1; B.bei 7:17-19; 1Tha 4:8 11:7Dan 7:7, 21; Ny 13:5-7; 17:8 11:8Ith 1:9-10

aabi puõth miet rin cī ē kockä karou thou. Aabi yai looi ku gemkē röt kăpath kamken, rin cī kockä karou koc pinyhom cöl agum apei. ¹¹ Tewēn cī nīn kadiäk ku abak thök, ke Wēi Nhialic la ē koc wēn cī thou gup ku jötkē röt. Go koc ŋic ke cī ke tiŋ riöc apei dīt. ¹² Ku piŋ kockä karou röl ke cöt pan Nhialic, “Bäk ten.” Gokē la nhial ke koc aterken daai, ke ke cath ē piööl yic. ¹³ Kaam wēn cök ka ayieekyieek dīt tet loi rot. Go tööŋ ē thiäär ē geu wīik, ku thou raan tiim kadhrou. Ku jöl koc cī pīr riöc ku leckē dīt Nhialic tō nhial.

¹⁴ Kēnē, yen ē thök kēreec ye kek rou, kēreec det ye kek diäk abö emēn!

Kaŋ ē Dhorou

¹⁵ Go atuny ē dhorou kaŋde kooth yic, guo atuuc nhial piŋ röt ke jam röldīt pan Nhialic ku luelkē, “Nhialicda ku Raan cī döc ku loc aaci bäany pinyhom ya kēden, ku Nhialic abi mac akölrīēc ebēn.”

¹⁶ Go kocdīt kathiārou ku ŋuan cī nyuc ē thōny Nhialic lööm wīik ke gut kenhīol piny, ku dorkē Nhialic, ¹⁷ ku luelkē,

“Beny Nhialic Madhöl yen reer thīn theer ku yen tō thīn emēn.

Yīn yeku leec rin cī yīn rieldu nyuõth yook ku yīn aci mäacdu jöck cök!

¹⁸ Ku koc kuc yīn aake cī puõth riääk rin ten riäŋ ē piändu

aci ben te bī koc cī thou yäth luk yic,

ku te bī koc ariöpdēn yök yīn luöi,

ku koc kāk Nhialic tiŋ, ku kacku ebēn koc yī door,

kockor ku kocdīt ebēn aaci ben.

Te bī koc cī pinyhom rac nöck aci ben.”

¹⁹ Go luaŋ Nhialic nhial ŋaany thok, ku röŋdīt löŋ ē döör ē tō alonhīn. Go kāk cīt bir ē deŋ ku ayieekyieek, ku mär ē deŋ ku tueny ē gei, röt looi.

Tik ku kēdiit cīt jakanuaan

12 ¹ Ku loi kēdiit koc göi rot nhial. Tik ē tō thīn ke cī aköl gööm piny ku pēei yecök, ku cieŋ ajöm la köu kuel kathiäär ku rou. ² Yeen ē tiŋ liac, nawēn cī thiök ke dhiēth, ke röp ku rem abi dhiau apei.

³ Ku ben det ben bei nhial kēdiit koc göi, ku kēdiit thith cīt jakanuaan la nhīim kadhrou ku tuŋ kathiäär ku ajöm kadhrou kenhīim. ⁴ Ku thēl tööŋ ē diäk kuel bei nhial yeyöl ku piir ke pinyhom, ku bīi ku keec tiŋ wēn dhiēth nom bī manh dhiēth tiit bī dhiēth bī cam. ⁵ Go tik manh ē moc dhiēth, yen bī koc pinyhom mac ke cīn aŋuän. Go atuny nhial ben ku rum meth man cin ku yeth nhial tēnē Nhialic thōnyde nom. ⁶ Go tik riŋ roor te cīi ceŋ, te cī Nhialic guiir tēnē ye bī yen la rēer thīn, bī la muk ē nīn tim ku buot karou ku thiärdätem.

⁷ Go tōŋ rot looi pan Nhialic. Atuny cöl Maikel ku atuuc kök aaci ben thör kek kēdiit wēn cīt jakanuaan ku atuöccke. ⁸ Ku kēdiit kēnē aci ben tiaam, ku aci ben cuop wei pan Nhialic. ⁹ Maikel kek atuöccke aaci kēdiit kēnē kek atuöccke ben cuop wei pan Nhialic. Kēnē yen ē Beny jakrec dīt wäär ye lueel ka cöl kēpiiny, yen raan ebēn cöl aloi awuöc. Acik ben cuat pinyhom kek atuöccke ebēn.

¹⁰ Ku pieŋ röldīt ke cöt pan Nhialic ku lueel,

“Emēn, te bī Nhialic koc luök aci ben! Emēn, Nhialic aci rielden yen benyŋaknom nyuõth! Emēn,

Raanden cī loc ku döc aci rielde nyuõth! Rin raan wäär ē köc Nhialic nom ku goony miethakua aköl ku weer, aci cuop wei pan Nhialic. ¹¹ Miethakua aaci jōŋrac tiaam rin cī Manh Amääl rot juaar bī nöck rienkua ku rin cī kek wet yic lek raan ebēn, ku keek aa kēc weiken nhiaar bik riöc ē thou. ¹² Week ebēn, wek koc reer pan ē Nhialic mietkē puõth, ku kuat kē reer ē pinyhom ku wär abi gum apei dīt. Rin jōŋrac aci cuop ē pinyhom tēnē ke, ku yen acit puõu mac rin acin nīn juēc cī päl ye bī yen luui.”

¹³ Nawēn le kēdiit cīt jakanuaan ŋic lon cī ye cuat pinyhom, ke cop tiŋ wēn cī manh moc dhiēth bī döm.

¹⁴ Go tik gām wuök cīt wuök acu ku bī cöl apeer tēden wäär roor te cīi cieŋ. Ku bī yen la tīit thīn run kadiäk ku abak, ku akēc jōŋrac ben lēu bī yiēc tetök. ¹⁵ Ku ŋok kēpiiny pieu dīt cīt aboor yethok rin bī tik mou. ¹⁶ Go tiöm pinyhom tik kony, rin cī yaardīt apei piny dai yic, ku wet piū thīn yōryōr. ¹⁷ Go kēdiit cīt jakanuaan puõu riääk tēnē tik apei ku le thör kek mīthken kök cī lööŋ Nhialic theek, ku mukkē wet yic cī Jethu nyuõth.

¹⁸ Ku la jōŋrac köc ē wär nom.

11:11Edhe 37:10 11:122Bŋ 2:11 11:13Ny 6:12; 16:18 11:15B.bei 15:18; Dan 2:44; 7:14, 27

11:18Wk 2:5; 110:5; 115:13 11:19Ny 8:5; 16:18, 21 12:3Dan 7:7 12:4Dan 8:10 12:5Ith 66:7; Wk 2:9

12:7Dan 10:13, 21; 12:1; Jut 9 12:9Cäk 3:1; Lk 10:18 12:10Jop 1:9-11; Dhäk 3:1 12:14Dan 7:25; 12:7

Läai karou

13 ¹ Ku tieṅ län roor rac apei ke bö bei adekdieet yic. Ku ala nhüim kadhrou ku tuṅ thiäär la nhüim ajöm kathiäär. Ku kenhüim ebēn rin aaci göt rin ē Nhialic tōon guōp. ² Län wēn ca tiṅ acit kuac, ku adit cök kek riööp beer la köth nhim, ku acit thok köör. Acī kēdiit cit jakanuaan gām rielde bi nyuc ē thöoc nhom cit benyjaknhom la ye cök. ³ Nhuom tōk, nhüim ē län kēnē ala yic piäär cit piäär tetök dit apei ku jol dem. Kōc ē pinynhom ebēn aake cī gāi ē län kēnē ku buothkē. ⁴ Keek ebēn aake ye jōṅrac door rin cī yen lei gām riel, keek aya aake ye lei door, ku luelkē, “Acin kēril cit ē län kēnē. Acin raan lēu bi thör kek ye.”

⁵ Go lei puöl bi jal nhiam apei, ku ye Nhialic lat. Go Nhialic päl riel kēnē tēnē pei kathiärṅuan ku rou. ⁶ Ku jol lei jam ku leet Nhialic kek kōcken reer nhial paande. ⁷ Acī Nhialic puöl bi thör kek kōc Nhialic ku tieem ke. Ku eci gām riel kōc pinynhom nhüim ebēn. ⁸ Kwat raan reer pinynhom ebēn abi ye adoor, kōc cī ye bi ya door aa kōc cī rienken göt athör pīr yic, ke piny kēc guō cak. Athör kēnē ē kēn Manh Amääl wäär cī nōk.

⁹ Na lakkē yiṅh, ke we piṅ apath, ¹⁰ “Kwat kē cī Nhialic guiir bi rot luōi yi abi rot dhiel looi kēya. Raan bi mac, raan bi teem röl ē pal abi teem röl. Wet kēnē ē lōn bi kōc cī gam dhiel gum ku rilkē puōth gamden yic.”

¹¹ Ku tieṅ län det ke bö bei piiny, ke la tuṅ karou cit tuṅ jōṅrac. ¹² Yeen alui riel cit riel län tuṅ ke ṅic län tuṅ, ku theny kōc ē pinynhom thīn bik län tuṅ aa door, län wäär cī tetök dem yenhom. ¹³ Ku looi kākdit jāṅ göi. Ee ye mac cōl alöony piny nhial ke kōc ebēn daai ē ye. ¹⁴ Län ciēen kēnē acī puöl bi kākdit jāṅ göi aa looi ke län tuṅ daai thīn. Rin ē kākka yen acī yen kōc pinynhom wēṅ bik la yecök. Aaci ben yōök bik kēdāṅ buth bi kek län tuṅ kieet ku yekē door, län wäär cī nōk ē pal ku ben pīr. ¹⁵ Län ciēen kēnē acī puöl bi wēi yāth kēwēn cī län tuṅ kieet yic, rin bi ya jam ku cōl kōc cī ye ye door anak. ¹⁶ Ku yōök län ciēen kōc ebēn, beny ku kic, ajak ku raan ṅōṅ, alony ku raan lääu nhom, bi raan ebēn kit tāäu kōṅden cuēc, tedē ke tēu yenhom tuṅ. ¹⁷ Acin raan cī puöl bi kēde yaac, tedē ke ṅōc ke cīn nhom kit kek rin, tedē ke ye akuēn rienke nyuōth.

¹⁸ Yin adhil kāṅ ṅic apath ba kēnē jāl deet yic. Raan la kē ṅic adhil kēnē dōt yic, bi akuēn ē län ṅic, rin akuēn akāac nyin rin ē raan, akuēn ē buōt kadātem ku thiärdātem ku dātem.

Manh Amääl ku kacke

14 ¹ Ku jol lä diēl ya nyin piny, ke ye Manh Amääl yen tieṅ ke kāac göt nhom Jeruthalem, kek kacke tim buōt ku thiärṅuan ku ṅuan cī rin Manh Amääl ku rin Wun göt kenhüim tuṅ. ² Ku pieṅ röl nhial kecit arōöl ē piū kat apei. Aye piṅ kecit mär deṅ thiek apei, tedē ke ye thoom juēc gut. ³ Ku kāac kōc tim buōt thiärṅuan ku ṅuan ē thöoc nhom tuṅ, ke ket waak yam läai pīr kaṅuan ku kōcdit nhüim. Waakkā acin raan lēu bi ke ket, aa keek kek kōc cī Nhialic luök ē röt. ⁴ Keek aa kōc cī röt tiit cie wic ē diäär. Keek aa kōc la cök. Ee Manh Amääl yen aye kē buōth cök kwat te le yen thīn. Kōckā kek aaci luök kam kōc ebēn, aa kōc ē Nhialic ku Manh Amääl, aa cit rap ē yam dhie ye juer Nhialic. ⁵ Ku keek aa kēc lueth kaṅ lueel. Ku acin kēreec cik kaṅ looi.

Atuuc nhial kadiäk

⁶ Ku tieṅ atuny det ke pār aliir yic nhial ke muk athör Wet Puōth Yam, wet pīr akōlriēc ebēn tēnē kwat dhiēth ku wuōt ku thok pinynhom ebēn. ⁷ Ku lueel röldit, “Thekkē Nhialic ku leckē rin diit yen apei. Rin nin aaci thök, nin bi yen kōc ē pinynhom yāth ē luk yic. Duōrkē rin yen aa cak nhial ku piny ku wērdit ku nyin ē piū.”

⁸ Ku buōth atuny rou atuny tuṅ cök, ke ye lueel ē röldit, “Gendit Babilon acī rac ebēn. Babilon ē ye kōc pinynhom cōl adek muōn kec apei, muōn ke cōl aloi kāk ē bal cī Nhialic ben rac puōu.”

⁹ Ku buōth atuny ē diäk atuuc tuṅ wēn karou cök, ke ye lueel röldit, “Raan län kēnē door kek kēden cī kieet, raan la kīn ē län kēnē yenhom tuṅ, tedē ke ye yecin. ¹⁰ Abi muōn riāṅ puōu ē Nhialic dhiel dek, muōn kēnē ē kē cī Nhialic puök ē biny riāṅ piānde yic. Kōckā aabi dēp many ben bei kuur yic tuc apei, ka atuuc nhial ku Manh Amääl daai thīn. ¹¹ Many bi ke nyop kēnē abi ke reem akōlriēc ebēn. Kōc ē lei ku kēden cī kieet ku kwat raan la kīn ē rienke, acii bi kaṅ lōṅ acin akōl ku weer.”

¹² Kēnē wetde yic ē lōn bi kōc ē Nhialic kepuōth deet, kōc löōṅ ē Nhialic theek ku lek gam tēnē Jethu.

¹³ Ku pieṅ röl nhial ke cōt ku lueel, “Dhil göt, kōc mit gup aa kōc thou emēn rin cī kek wet Beny gam.” Ku lueel Wēi Nhialic, “Ee yic Alanden! Keek acii bi ben gum atheer. Kāk cik looi aabi cath ke ke.”

Tēmtēm pinynhom

¹⁴ Ku lä daai nhial, ke ye luääät yer yen tieŋ ku kēcīt Manh raan ke cī nyuc ē piööl nhom, ku ala nhom ajöm cī looi milāŋ töc, ku amuk pal moth thok yecin. ¹⁵ Ku bö atuny det bei luaŋ Nhialic ku jieem röldīt tēnē raan cī nyuc ē piööl nhom, “Jök luoi cök ye pal kēnē, kāk tem pinynhom aaci luok, ku akölden bī ke tem aci ben.” ¹⁶ Go raan wēn cī nyuc ē piööl nhom palde met yic ku ler luōide yic, ku kēya, kēriēec ēbēn pinynhom aci tem.

¹⁷ Ku tieŋ atuny det ke bö bei nhial luaŋ Nhialic ke muk palden moth aya. ¹⁸ Ku bö atuny wēn muk riel ē mac bei ariäk lööm. Ku cōal atuny wēn muk pal moth röldīt ku lueel, “Löm paldu ku tem abiēc dom yic pinynhom rin abiēc aci luok.” ¹⁹ Ku jəl atuuc palde met yic ku jəl abiēc tem piny, ku kuut keyiic ku yeth ke te bī ke la nhiaç yiic thīn, rin riāŋdīt puōu Nhialic. ²⁰ Abiēc ēcī nhiaç geu kōu ayeer, go ya riem yen loi kuēer, abī riem löl bār kōu apei ku thuuth yic looi.

Kādīt rec bī atuuc nhial beei

15 ¹ Ku tieŋ kēdīt det kōc göi nhial. Kēnē, aake ya atuuc kadhorou la riel bīk käreç apei kadhorou gām kōc, ke ye kek awuōc ciēen bī Nhialic tem kōc rec, rin kek aabi riāŋ ē piānde jāl thök. ² Ku tieŋ kēcīt adekdieet le pīu nyīn kīr thīn cī liäap kek kēcīt mac. Ku tieŋ kōc wäär cī lei kek kīnden cī ye kieet tiaam aya, agut lān wäär ye rienke ŋic akuēn. Keek aake kääc adekdieet le pīu nyīn kīr you ke muk thom cī Nhialic gām ke, ³ ku ketkē waak Mothith alony ē Nhialic, ku waak Manh Amääl ēlä,

“Yīn Nhialic, yīn aril acīn kē thōŋ ke yīn,

kāk ye looi aa path ku aa kōc göi!

Ee yīn amac pinynhom ēbēn,

kuat kāk ye looi ēbēn aala cök ku aa yith.

⁴ Raan ēbēn abī riōc ē yīn Beny! Ku rienku abī leec atheer!

Ee yīn ē rot yīn Nhialic ē yic.

Kōc ē pinynhom aabi ya ben ku dorkē yīn.

Raan ēbēn aci tepeth ye yīn luui thīn tiŋ.”

⁵ Nawēn ē kēnē cök, ke ya tiŋ luaŋ Nhialic ke ŋaany thok, kek duēl Nhialic nyuōoth alonŋthīn. ⁶ Ku bö atuuc nhial kadhorou, wäär muk kādīt rec apei kadhorou bei luaŋ ē Nhialic. Keek ēbēn aake ciēŋ aleth yer la diardiar, ku karkar cī looi milāŋ töc aa cīk kaar kepuōth. ⁷ Go lān tök kam lääi wäär pīr kaŋuan, atuōny tök ya atuuckä gām aduŋ milāŋ töc la yic awuōc thiek bö tēnē Nhialic pīr akölrīēec ēbēn, bī gām kōc ē pinynhom. ⁸ Duēl ē Nhialic ēcī tol paat yic piny, tol bö diik ku riel Nhialic yic. Ku acīn raan lēu ye bī la thīn, yet te bī käreç dīt apei kadhorou wäär muk atuuc nhial ku bī ke pinynhom, kaŋ thök.

Käreç dīt apei ciēen kadhorou

16 ¹ Guo röldīt apei piŋ ke cōt luaŋ pan Nhialic yic, ke ye lueel tēnē atuuc nhial kadhorou ēlä, “Lak pinynhom ku gamkē kādīt rec ciēenkä kadhorou, käreç riāŋ puōu ē Nhialic.”

² Go atuny tueŋ kēreec cī Nhialic lek ye bī gām kōc ē pinynhom gam. Go ya yōntōök rec rem apei kek tul kōc la gup kīn lei gup, ku kōc kēden cī kieet door aya.

³ Go atuny ē rou kēreec cī Nhialic gām ye bī gām kōc pinynhom gam. Go ya pīu adekdieet kek wel röt bīk ya riem, ku thou kāk pīr reer pīu yiic ēbēn.

⁴ Go atuny ē diäk käreec cī Nhialic gām ye bī gām kōc pinynhom gam. Go ya pīu wēr yīth ye dek kek wel röt bīk ya riem. ⁵ Guo atuny yen muk pīu pinynhom piŋ ke lēk Nhialic, “Yīn aci yic tek kōc ē käreçkä yiic, tedu kan emēn ku tetheer yōn, ee yīn apath yītök rin le luōŋdu cök. ⁶ Kōc rec wäär cī kacku ku kōc kākku tiŋ nök aaca gām riem bīk dek, yen kēpath ke ke.” ⁷ Ku piēŋ raan röl ke dhiau ten ariäk ku lueel, “Ee tede Beny Nhialic Madhōl, käreç ca gam aa yith ku aa la cök, luk aca ŋieç looi!”

⁸ Go atuny ē ŋuan kēreec cī Nhialic gām ye bī gām kōc pinynhom gam. Go aköl tuēc apei, ee cī Nhialic puöl bī kōc nyop atuōc. ⁹ Kōc aake cī atuny aköl nyop apei abī ke gām gup yōntōök. Gokē Nhialic lat guöp, Nhialic yen bī käreçkä, ku cīk luoi käreç päl ku cīk Nhialic ye leec.

¹⁰ Ku gem atuny ē dhiēc kēreec cī Nhialic gām ye ku ler ku tēu thōny lān rac nom. Go ya muōōth yen kum kōc mec lei piny arek abik kethook aa kac rin areem, ¹¹ ku yekē kārec apei lueel ē Nhialic guōp rin areem ku yōntōōk rēer kegup, ku cīk luoi kārec pāl.

¹² Go atuny ē dātem kēreec muk gam, go ya wārdit Yuparet yen dōu, bī bānyaknhīim loŋ ciēen puōl bik tem kek apuruōōkken. ¹³ Ku tieŋ wēi jakrec kadiāk cīt aguek. Keek aake bō bei kēdit cīt jakanuaan thok, ku lān rac thok, ku thoŋ lān wāār aya bō kek wet ē lueth yen kōc wēŋ nyīn. ¹⁴ Keek aa wēi jakrec ē cath ke loi kāk kōc gōi. Wēi jakreckā kadiāk aa bāny pinynhom ēbēn kuōōt nhīim bī ke yāth tōŋ yic. Tōŋ kēnē ē tōŋ bī rot looi luŋdit bī Nhialic Madhōl luk looi tēnē kōc pinynhom ēbēn.

¹⁵ Aye Beny lueel, “Pieŋkē! Yen abō cīt ya ye cuār wakōu. Raan mit guōp ē raan ba yōk ke kēc nin, ciēŋ alāthke, rin bī cīi cath ke cīn alanh cieŋ bī guōp yār te tiŋ ye.”

¹⁶ Ku jōl wēi jakreckā bānyaknhīim kuōōt nhīim te ye kōc Itharel cōol, Amagedon.

¹⁷ Ku jōl atuny ē dhorou kēreec muk pāl aliir yic. Go Nhialic jam rōldit nhial ē thōōc nom luaŋde ku lueel, “Kuat kēkith ēbēn acī luōoi tecit tede.” ¹⁸ Ku bier deŋ apei, ku meer ē mār thiek ku looi ayieekyieek rot abī kōc riōōc ēbēn. Acīn kēdit cīt kēnē cī rot kaŋ looi tēnē cek ke raan pinynhom, ayieekyieek rec piny cīt kēnē. ¹⁹ Go gendit Babilon yeyic tek ē diāk, ku wit ayieekyieek geeth ē pinynhom juēc, ku kēya, ke Nhialic tēm gen Babilon awuōc thiek apei rin riāŋ piānde.

²⁰ Tewēn le piny rot yāak ke yōn thōny wīr mār, ku la gat dir piny ēbēn. ²¹ Go gōdit thiek apei löōny piny nhial ē kōc nhīim. Ku kēya, ke kōc leet Nhialic rin cī yen deŋ cōl atueny gōi thiek apei cī piny ben rac.

Tiŋ rac adējōōk

17 ¹ Go atuōny tōk atuuc wāār bō nhial kadhorou muk kārec kadhorou ben tēnē ya ku lueel ēlā, “Bāār ba yī nyuōth te bī Nhialic ē tiŋ rēec adējōōk tem awuōc thiin, yen tiŋ rēer wēr yōth.^a ² Bānyaknhīim ē pinynhom aacī kārec apei, kāk ē bal looi kek ye, ku kōc ē pinynhom aake ye miānde dek bik wīeet, ku te cī kek wīeet ka jōl kārec apei kāk ē bal looi kek ye.”

³ Go Wēi Nhialic la yaguōp, ku nyieei atuny Nhialic ya ku yeth ya roor te cīi cieŋ. Ee teen ke ya tiŋ tiŋ cī nyuc lān thith kōu, lān la nhīim kadhorou ku tuŋ kathiāār cī guōp thiāŋ rin ē Nhialic lat guōp. ⁴ Tik a cieŋ alanh thith ku alanh mathiāŋ. Ku acī mīlāŋ tōc ku kākōk la diardiar ku guēt dhēŋ thiāāŋ yeguōp. Ku amuk aduŋ cī looi mīlāŋ tōc cī thiāŋ kāracken ē bal ye looi. ⁵ Ku yenhom tueŋ acī rin gōt thiin rin cie deet yiic. Rin ye lueel ēlā, “|scEe yen Babilondit, yen ē man diāār rec ēbēn, yen aye kārec jāl thiin kārec ē pinynhom ēbēn.|d” ⁶ Ku tieŋ tiŋ wēn ke cī wīeet riem ē kōc Nhialic wāār cī ke nōk, rin cī kek wet Jethu gam.

Ku wēn tiŋ yen ye, guō gāi apei. ⁷ Go atuny nhial ya thiēēc, “Yēŋō cī gōi? Yīn aba lek wetde yic yen kēnē, ku lān cieth yen la nhīim kadhorou ku tuŋ thiāār. ⁸ Lān yen ca tiŋ ēmēn acī kaŋ pīr theer, ku acīi ben pīr ēmēn rin abī ben bei piiny tethuth mec yic akōldā, ku abī jal la rōm ke riāāk. Kōc pīr ē pinynhom kēc Nhialic gāt athōrde yic, athōr ē pīr theer kēc piny cak, aabī gāi te tiŋ kek ē lān kēnē. Acī kaŋ pīr, ku acīi ben pīr ya akōlē, ku abī ben dhuk pinynhom.”

⁹ Go atuny nhial lek yā, “Kēnē awīc raan ŋic tak. Nhīim kadhorou aa rēer nyīn kuōr kadhorou kek cī tik nyuc kēnhīim. ¹⁰ Kek aa bānyaknhīim kadhorou aya. Bāny kadhiēc kamken aacī liu. Raan tōk aŋot ye benyāknhom ēmēn ku det aŋot kēc ben, ku na le ben ka bī rēer ē bāāny yic kam koor. ¹¹ Ku lān bī ben bei tethuth, yen abī ya benyāknhom ye kek bet. Ku yen ē raan kam bānyaknhīim kadhorou, ku yeen abī rōm ke riāāk.

¹² “Tuŋ kathiāār ye ke tiŋkā, aa rēer nyīn bānyaknhīim kathiāār kēc baai guō mac, ku aabī riel dhiel yōk bik baai mac kek lei kam thiin koor. ¹³ Wetden ē tōk, abik gam kedhie bik bāānyden thōn lei.

¹⁴ Bānyaknhīim kathiāār ku lei aabī keyiic mat ku therkē kek Manh Amāāl. Ku keek aabī Manh Amāāl kek kacke ke tiaam, rin Manh Amāāl yen ē benydit ē bāny, ku bānyaknhīim ku kacke kek aa kōc cī Nhialic kuany ku cōol ke, ku kek aa kōc cī wetde gam.”

¹⁵ Go atuuc lek ya, “Pīu ye tiŋ cī tik nyuc kēnhīim, aa rēer nyīn kōc ē pinynhom ēbēn. ¹⁶ Lei ku bānyaknhīim kathiāār ca tiŋ aabī kēnhīim wel adējōŋ kēnē. Abik dōm ku thatkē ku retkē kōu, ku pālke ke cīn kē cieŋ. Aabī guāpde cuet. Abik rac ku yōt abaŋ cī dōŋ ē mac. ¹⁷ Bānyaknhīim kathiāār kākā aabī ē kēnē looi, rin cī Nhialic ye tāāu kepuōth bik bāānyden gām lei, rin wīc Nhialic ye kēya. Aabī lāāi theek yet te bī kē wīc Nhialic thōk.”

^a17:1Wetde yic gen Babilon. (Jer 51:13)

¹⁸ Go atuny nhial lek ya, “Tiņ ca tiņ kēnē ē gendit yen mac bāny pinynhom ēbēn.”

Nhialic aci Babilon rac

18 ¹ Nawēn ē kēnē cōk ke ya ben atuny nhial det tiņ ke bō bei nhial pan Nhialic, ku atuny kēnē ala riēdit apei. Ruel dīt yeer wēn bō bei tēnē yen aci pinynhom ēbēn ben looi bī yer. ² Ku cōöt rōldit apei, “Gendit Babilon aci riāāk. Kōc aaci kat thīn ēbēn.

Acin raan cī dōņ thīn, aa jakrec ku diet rec cīt awujoņ.

³ Kārec ē bal ye looi gen Babilon aaci yen ke pinynhom ēbēn liāap, bī bāny pinynhom keek aa looi kāk ē bal, ciet ke cī muōn kec apei dek.

Ku teen yen aci Nhialic rac puōu yeguōp.

Ku kōc ē pinynhom aake ye ʒōc thīn ku loikē kārec Nhialic rac puōu.”

⁴ Ku piēņ rōldet ke jam nhial ku lueel,

“Kackie jālkē geeu!

Ku bī week cīi met awuōc looi keek yiic kā,

ku bī Nhialic we cīi yīk kādit rec apei cimēnden.

⁵ Awuōccken cīk looi aaci juēc nawēn

ke la nhial abīk Nhialic dōöt bīk la rac puōu.

Go Nhialic awuōckā yōk ēbēn, ku aaci bī kaņ puōl ke cīi tem awuōc.

⁶ Dhielkē luōi kārec cīt kāwāār cī kaņ aa luōi week.

Dhielkē kārec wāār cī looi cool kāk wār kāk wāār cī kaņ luōi kōc kōk.

Adhielkē gām muōn kec apei bī wiēet cīt tewāār ye luōi kōc kōk.

⁷ Ee nhiam riēden dīt rēer ke yeen,

ku pīrden rēer yen kāpath yiic.

Adhielkē gām kē rem yeguōp thōņ kek miet ē puōu dīt rēer yen thīn.

Rin ye yen rot leec ēlā,

‘Yen tiņ dīt ņaknhom mac paandie ē riel cīn ke tem ʒanhom,

ʒen acin mony bī thou ku ba dhuur.’

⁸ Rin ye Babilon jieem kanhiaam kēya,

ee kaam thiin koor ku abī Nhialic kādit rec

apei cōl aabō tēnē yeen cimēn tuaany, ku cōņdit apei ku thuōu.

Abī ʒōt mac bī nyop ēbēn, rin Beny Nhialic yen bī ye tem awuōc,

ala riēdit apei.

⁹ “Bāny ē pinynhom wāār cī kārec looi kek ye aabi dhiau ku lōōnykē puōth tēnē ye, te tiņ kek tol many cī ye ʒōt nhom temec. ¹⁰ Aabi kōc temec, rin cī kek riōc ciet ke bī gām awuōc thiek cīt kēn cī gām Babilon, rin wāār cī kek kārec looi aya kek ye. Abīk aa lueel,

‘Ye kērec ē dē, gendit Babilon, gen ril yen cī ʒo riāāk ye kam thiin yic!’

¹¹ “Kōc ē ʒōc pinynhom aa dhiau rin Babilon, rin acin raan bī kākken ben lōk ʒōc. ¹² Milōōņken tōc, ku aleth path, aleth cī looi milāņ thith ku guēt path ku kāpuōth kōk cie lac yōk ku tuņ aa kōn, ku kuōr path la diardiar, acin raan bī keek ben lōk ʒōc tēnē ke. ¹³ Miōk ņīr, māau ku abīk, ku yōk ku thōk, ku mīthiōōņ ku lāāi kōk baai ku tiim path ku aloony, acin raan bī ke lōk ʒōc. ¹⁴ Abī kōc ʒōc aa lueel tēnē Babilon ēlā, ‘Kuat kāpath wāār ye ke cam, ku kāpuōth wāār ye ke cieņ aaci rac, ku aaci bī ben yōk acin.’ ¹⁵ Kōc ē ʒōc wāār cī jak rin ye kek kākken ʒōc ye aabi dhiau te tiņ kek ye ke dep. Aabi ya kōc temec rin wāār cī kek mat kek ye ciet ke bī mat ē riāāk yic aya. ¹⁶ Abīk aa lueel,

‘Ye kērec ē dē tēnē gendit cīt kēnē,

gen dīt dhēņ cīt raan ceņ milōōņ tōc ku guēt path yeyeth!

¹⁷ Rin kākā aaci ʒo ben mār nyin yic.’

“Kōc ē riāth geer adekdiēet yiic, ku kōc la kākken yekē keek la ʒaac riāth yiic, kāk ye kek pīr thīn aabi kōc temec, ¹⁸ ku dhieukē te tiņ kek tol nhom ke dep geeu kek kāk tō thīn ēbēn, ku jōlkē ya lueel, ‘Makei! Acin gendit cī kaņ ciet ē gen!’ ¹⁹ Ku jōlkē kenhīm pot ē ņeth bīk nyuōth lon cī kek puōth lōny ku dhieukē apei ku luelkē,

‘Makei! Cī gendit riāāk kēya?’

18:2Ith 13:21; 21:9; Jer 50:39; 51:8; Ny 14:8 18:3Ith 23:17; Jer 51:7 18:4Ith 48:20; Jer 50:8; 51:6, 45

18:5Cäk 18:20-21; Jer 51:9 18:6Wk 137:8; Jer 50:29 18:7-8Ith 47:7-9 18:9-10Edhe 26:16-17 18:11Edhe 27:31, 36

18:12-13Edhe 27:12, 13, 22 18:15Edhe 27:31, 36 18:17Ith 23:14; Edhe 27:26-30 18:18Edhe 27:32

Gendit wäär ye koc la riäth jieek la yök thün,

yen cī guo riääk ye kaam thiin yic kek kāk tō thün ēbēn!

²⁰ Koc reer pan Nhialic mietkē puōth rin cī Nhialic Babilon rac.

Mietkē puōth koc ē Nhialic ku atuuc ē Raan cī loc ku doc,

ku koc kāk Nhialic tūn rin cī Nhialic Babilon tem awuōc tecit tēn kārec wäär cī keek luōi week.’ ”

²¹ Ku tieṅ atuny Nhialic ril cī kuurdit thiek kuany ku piir wīir adekdiēet yic ke lueel,

“Kēnē yen ee te bī gendit Babilon rac thün,

ku acī ben tūn acin.

²² Yin Babilon acin lääb bī ben piṅ yiic tedu,

ku acin kēēt bī ben piṅ rōt ke gut thom, tedē ke ye keṅ kooth yiic.

Kockun atēēt ēbēn aabī määb,

ku wēthkun ye rap guur abī cīen rap ben guur thün.

²³ Ku mec acī bī kaṅ ben tūn nyin ke dep,

ku acin ruei bī ben looi,

rin kockun ē ɣoc kek aake ye kocdit pinynhom,

ē pinynhom cam tebäär ē ruēeny.”

²⁴ Nhialic acī Babilon tem awuōc rin le yen guōp awuōc cī yen koc kāk Nhialic tūn nōk, ku koc juēc kōk ē Nhialic, Babilon ala guōp awuōc cī yen koc juēc ē pinynhom ēbēn nōk.

Riāṅ ē Babilon ē koc Nhialic miēēt puōth

19 ¹ Tewēn cī atuny ril thōk ē jam, ke ya piṅ koc rōt nhial ke loi kieeu apei ku luelkē,

“Lecku Nhialic! Nhialic yen acī yo luōk, diik ku riel aa kāk Nhialicda kedhie.

² Luōṅde ee yic ku ala cōk.

Yen acī tūn adējōok wäär ṅiec tem awuōc thōṅ kek kāk cī luōi koc ē pinynhom.

Babilon cī pinynhom rac, rin rim koc Nhialic atō yecin.”

³ Ku ben thān awēn loi kieeu yai cam,

“Lecku Nhialic!

Babilon abī dēp ku many nyop ye abī tol ya la nhial akōlriēec ēbēn.”

⁴ Ku tieṅ kocdit kathiārou ku ṅuan, ku lääi pīr kaṅuan ke gut kenhiol piny ē Nhialic nhom ku dorkē ke cī nyuc thōnyde nhom,

“Yenakan, Lecku Nhialic!”

Yan thiēṅ Manh Amääl

⁵ Ku pieṅ rōl ke cōt thōoc lööm ku lueel,

“Wek aa dhil Nhialicda leec, week ēbēn,

koc ril ku koc niōp, wek koc thek yeen ēbēn ye door.”

⁶ Ku pieṅ koc juēc ke loi kieeu nhial apei, ke loi arōōl cīt arōōl ē piū kat apei, ku cīt mär deṅ ku luelkē,

“Lecku Nhialic! Rin Bānyda, Nhialic Madhōl ee Benyṅaknhom!

⁷ Jōlku puōth miet ku lecku Nhialic,

rin cī nīn thiēṅ Manh Amääl thōk, ku nyan thiak acī rot guiir bī lor.

⁸ Acī Nhialic ruōk aleth path cīn gup acuol bī keek cieṅ.”

Aleth path aatō nyin kāpath ye raan luōi Nhialic.

⁹ Go atuuc lek ya, “Gāt wēlkā, koc mit puōth aa koc cī cōol ē yan thiēṅ Manh Amääl yic.” Ku met thün ēlä,

“Wēlkā aa wēl ē yith bö tēnē Nhialic.”

¹⁰ Guo ṅanhiaal guōt piny yenhom ba door. Go lek ya, “Duk loi kēya! Ee Nhialic yen aya luōōi cimēn ye yin ku miethakun cī gam, koc cī yic cī Jethu nyuōōth, buōōth yic. Ee Nhialic ē rot yen aye door.” Rin yic cī Jethu nyuōōth yen ē koc cōl agam wet ē Nhialic.

Raan cath mathiāṅ yer

¹¹ Ku tieṅ pan Nhialic ke ṅaany thok, go ya mathiāṅ yer yen tieṅ thün kek raan cath ē ye. Ee yen raan ē Nhialic luōōi ē puōn yer, kuat kāk ye looi ēbēn aaya yith, te looi yen luk tedē ke ye tōṅ, ka la cōk ēbēn.

18:19Edhe 27:30-34 18:20L.rou 32:43; Jer 51:48 18:21Jer 51:63-64; Edhe 26:21 18:22Edhe 26:13; Ith 24:8

18:22-23Jer 7:34; 25:10 18:24Jer 51:49 19:2L.rou 32:43; 2Bṅ 9:7 19:3Ith 34:10 19:5Wk 115:13

19:6Edhe 1:24; Wk 93:1; 97:1; 99:1 19:11Edhe 1:1; Wk 96:13; Ith 11:4

¹² Yen adep nyin cimēn mac, ku acieŋ ajōm juēc yenhom. Acī gāt kōu rin, ku ē yen aŋic rienke ē rot. ¹³ Ku acieŋ alanh bār yekōu cī kōu thiāŋ ē riem. Ku rienke aa, “Wet ē Nhialic.” ¹⁴ Abuōth apuruuk Nhialic ke cieŋ aleth yer, ku aake cath mīthiōōŋ yer. ¹⁵ Ku pal moth ē ben bei yethok bī yen kōc ē pinynhom tōk. Abī kōc pinynhom mac ke cīn aŋuān, aabī nhiaç yiic cimēn mōn nhieç bei athuāāi yic, bik riāŋ puōu ē Nhialic yōk kegup. ¹⁶ Ku alanhde kōu ku yeyām, rin acī gōt thīn ēlā, “|scBenyŋaknhom ē Bānyŋaknhīim, Benydit ē Bānydit ēbēn.|d”

¹⁷ Guo atuny nhial kääc akōl nyin tiŋ, ke cōl diet pār aliir yic ēbēn ku lueel rōldit, “Bāk ten, bāk ben mīth miēthdīt ē thēi cī Nhialic guiir! ¹⁸ Bāk ŋuetkē gup bānyŋaknhīim, kōcdīt apuruuk, kōcdīt ril, gup mīthiōōŋken ku kōc cath ē ke, gup kōc ēbēn, kōc aloony ku kōc cie aloony, kōcdīt ku kōc kor!”

¹⁹ Ku tieŋ lei ku bānyŋaknhīim ē pinynhom kek apuruōōkken, ke kuut kenhīim ēbēn bik la thōr kek raan cath mathiāŋ ku apuruōōkke. ²⁰ Go lei dōm, kek raan wet lueth wēŋ yen kōc nyīn lueel, raan kāk kōc gōi looi, bī kōc la nhīim kīn lei kenhīim tueŋ muōr rin kākken kā ku dorkē kēden cī kiēet. Go keek ēbēn karou pieer manydit tue apei ben bei kuur yic ke pīr. ²¹ Ku nāk apuruōōkken ēbēn ē pal ben bei raan cath mathiāŋ thok. Ku guāpken aacī diet ben ŋueet.

Ruōōn tiem tōk

20 ¹ Ku tieŋ atuny nhial ke bō piny, ke muk wēnh ye tethuth mec yic tuer thok, ku luŋ arēk dīt thiek apei. ² Ku dōm atuny nhial kēdīt cīt jakanuaan, kēpiiny theer yen jōŋrac dīt ē pinynhom, ku rek ē ruōōn tiem tōk. ³ Ku piir tethuth mec yic apei, ku riit thīn ku thiōōk thīn ē thaany. Ku abī rēer ē teen ē ruōōn tiem tōk. Ku kēya acīi bī lēu bī kōc pinynhom ben tuōōr nyīn. Ku na la runkā thōk ke yeen abī pāl ayeer ē kaam koor.

⁴ Ku tieŋ kōc ke cī nyuc ē thōc nhīim, ku tieŋ wēi kōc wāar cī tem rōt rin cī kek wet Jethu Krītho ku yen wet Nhialic gam. Kōckā aake nāk ke rin kēc kek wet lei gam ku dorkē, ku aacīn gup kīn ē lei kenhīim tueŋ ku kecin. Aacī ben pīr ku nyuuckē ē thōc nhīim, rin cī Nhialic ke gām riel bik mac. Ku jōlkē mac kek Raan cī lōc ku dōc ē ruōōn tiem tōk. ⁵ Na cī runkā thōk, ke kōc kōk cī thou, kōc cī gam ku kōc ē pinynhom aabī ben pīr, ku ē yen jōn rot tueŋ bī gup kōc cī thou rōt jōt. ⁶ Ku Nhialic abī kōckā dōc, ku keek aabī ya kacke rin ye kek kōc cī kaŋ pīr, rin cī ke kaŋ jōt thou yic. Ku keek aacīi bī thou thon ē rou, ku aabī ya kōc Nhialic luōōi ku Jethu Krītho, ku aabī mac kek ye ke ye bāny ē tōk ruōōn tiem tōk.

Jōŋrac acī tiaam

⁷ Te le ruōōn tiem tōk thōk, ke jōŋrac abī lony tewāar cī ye mac thīn. ⁸ Ku abī ben ben ē pinynhom bī kōc kōk ben wēēŋ nyīn, kōc cī thiēi ē beei pinynhom yiic cōl Gok ku Magok. Aabī jōŋrac mat yiic ku yeth ke tōŋ yic. Ku keek aa juēc ka cīt liēet agōr. ⁹ Ku weerkē pinynhom ēbēn, ku goolkē gen nhieer Nhialic piny, gen rēer kacke thīn. Go Nhialic mac tuōōc piny nhial bī ke nōk ēbēn. ¹⁰ Ku cuet jōŋrac wāar ke wēŋ manydit tue apei ben bei kuur yic, tewāar cī lei ku kōc tōr lueth kaŋ cuat thīn. Ku keek aabī reem akōl ku weer ē teen akōlriēec ēbēn.

Luŋ thōk ē piny

¹¹ Ku tieŋ thōnydit yer apei kek raan cī nyuc yenhom. Go piny ku nhial määar yenhom tueŋ ku cīn raan ben ke tiŋ acīn. ¹² Ku tieŋ kōc cī thou ēbēn kōcdīt ku kōckor ē pinynhom ēbēn ke kääc thōoc lōōm. Ku jōl athōr ŋaany yiic, ku athōr cī kāk cī kōc pinynhom looi gōt thīn, ku jōl athōr det yen athōr pīr ŋaany yic aya. Ku kōc ēbēn aake ye tem awuōc thōŋ kek kē cī ŋek looi pinynhom, cī gōt rienke thook athōor yic. ¹³ Ku jōl kōc ke thou wīir ben ku keeckē Nhialic nom luk yic, ku jōl kōc cī thou rēer guāpken piiny reŋ yiic rōt jōt aya, ku keeckē Nhialic nom luk yic. Ku keek aacī ben tem awuōc thōŋ kek kāk ke cīk looi pinynhom. ¹⁴ Go thou nom guōp cuat manydit dep apei yic. Manydit dep kēnē yen ē thon ē rou. ¹⁵ Kuat raan liu rienke athōr ē pīr yic, acī cuat baau mac dep kēnē yic.

Pinynhom ku nhial ē yam

21 ¹ Ku jal pinynhom ku nhial ē yam tiŋ, rin cī piny ku nhial theer määar, ku cīn wērdit kōk ben rēer thīn. ² Ku tieŋ gen Nhialic yen Jeruthalem ē yam, ke bō piny nhial pan Nhialic bī ben pinynhom. Gen ē Nhialic acī guiir cimēn nyan cī guiir bī gām moc. ³ Ku pieŋ raan ke cōt rōldit apei ē thōoc lōōm ku lueel, “Emēn pan Nhialic arēer kek raan! Ku keek aabī ya kacke, ku Nhialic nom guōp abī rēer ke ke ku abī ya

Nhialicden. ⁴ Abi piu weec wei kenyin. Ku acin raan bi ben thou acin. Acin raan bi puou ben riiaak ku dhieeu, tedē ke ben terem yök yeguöp cimēn theer, rin käng aaci röt waar.”

⁵ Ku lueel raan ci nyuc thöoc nom elä, “Tienkē! Käng ebēn aluoui bik aa yam!” Ku lueel aya elä tēnē ya, “Gät kēnē, alēu ba gam yen kē lueel rin wēlkā aa yith.

⁶ “Kuat kakkith ebēn ēci luoui tēcit tēde. Ee yen jök ē cök ku yen thök ē käng. Yen abi raan nek rou gām piu dek, aba gām piu ē pīr, ku aba gām ye ē path. ⁷ Kuat raan ci tiam abi kakkā yök tēnē ya. Aba gām ē kakkā ebēn, ku yen abi ya Nhialic ku yeen abi ya manhdie. ⁸ Ku koc riöc, ku koc ci gamden puöl ku koc cā adumuööm looi, koc ci koc nöc, koc ē luui käreec, koc ē jönrac, koc jakrec door, ku koc alueth, kockā ebēn aabi cuat manydit tuec ben bei kuur yic, ku yen ē thon ē rou.”

Jeruthalem ē yam

⁹ Go atuöny tök kam atuuc kadhorou wäär muk kērac apei ciēen ben ku cuöl ya, “Bäär lokku ba yi la nyuöth nyan bi ya tiņ Manh Amääl.” ¹⁰ Go Wēi Nhialic la yaguöp ku yeth atuuc ya ē kuurdit bār nom. Ee tēen ke nyuth ya Jeruthalem gen ē Nhialic ke bö piny nhial pan Nhialic. ¹¹ Ee dep diardiar ke diik Nhialic. A dep cit kuur ci guaņ bi la lēņlēņ. ¹² Ku aci gööl piny kal ril bār, ku ala thok kathiäär ku rou, ku thokkā ebēn aaye atuuc köc thīn. Ku thokkā aaci rin kuat Itharel kathiäär ku rou göt thīn. ¹³ Ku kal ci geu gööl piny ē la guök kaņuan, ku guöņ tök ē la thok kadiäk. ¹⁴ Kal ci ke geu gööl piny aaci buth aleeldit kathiäär ku rou nhīim. Ku rin atuuc Manh Amääl kathiäär ku rou aake ci gät aleelkā kööth.

¹⁵ Ku atuny wäär yen jam ke ya, amuk wai ci looi milāņ töc bi yen geu athem, pänyde ku thuokke. ¹⁶ Geu ala guök kaņuan thöņ thook. Ku them atuny nhial geu waiden wēn muk, ku yök ke cit meel tiem tök ku buot kadhiēc ber ē köu, ku läau yic kek ber la nhial ē cit kēnē aya. ¹⁷ Ku them atuuc la nhial ē kal ku dit ē köude aya, ku yök ke ye akääth thiärdätē. Käk ke ye atuuc them aake cit kāk ye koc them ē path.

¹⁸ Päny ci geu looi, aaci buth kuur yer dhēņ ku geu nom ēci looi milāņ töc la gei cit macar. ¹⁹ Puööny ē geu aake ci jöök cök kuat aleel la diardiar. Aleel ke ci puööny jöök cök aya aake yiic thiäär ku rou. Kök aake thith, ku kök aa yer ku kök aa maņök, kök aa mihiööņ, kök aa mikēth, kök aa miyēn, kök aa milööth, kök aa maliik, ku kök aa mamer. ²⁰ Ku kit ebēn aake ye thiäär ku rou. ²¹ Thok kathiäär ku rou ē genē aake ci looi aleel yer kathiäär ku rou, thuöņ tök ē ye looi alel yer tök, ku gēek ē geu yic aaci looi milāņ töc la diardiar cit macar.

²² Yen akēc luaņ Nhialic ye koc röök thīn tiņ, ee gen kēnē yic, rin Beny Nhialic Madhöl ku Manh Amääl kek aa luaņ Nhialic. ²³ Gen kēnē ēcii wic ruel aköl, tedē ke ye peei, rin ala ruelde ē rot, rin rueldit Nhialic yen aye ye mer yic, ku Manh Amääl yen aye ye mer yic cimēn many adök. ²⁴ Ku ruel ē gen yen aye koc cath thīn, ku bāny pinynhom aabi ya ben bik jaakden beei thīn.

²⁵ Kal aabi ya rēer ke ŋaany thook aköl ku weer, rin piny aci ben a cuöl. ²⁶ Koc wuöt ebēn aabi ben ē gen yic rin bi kek Nhialic ben aa door ku leckē. ²⁷ Acin koc la gup adumuööm bi puöl bik la geeu, ayi koc ē luui kāk koc cöl ayār gup ku koc tör lueth. Koc bi puöl bik la geeu aa koc ci rienken göt athör ē pīr Manh Amääl yic.

22 ¹ Ku ben atuny nhial ya nyuöth wār ci thiāņ piu ē pīr la kirkir apei bö tēnē thöny Nhialic ku Manh Amääl, ² ke kuēer geeu gēk ciel yic. Agör ē wār löņ ku löņ, akēc tim ē pīr thīn, tim luök ē peei thok ebēn ruöön tök yic, ku koc wuöt ebēn aa yiethke lööm bi kek yöntöök aa cöl adem, ku tueny kök aya. ³ Acin det meen Nhialic bi rēer ye gen kēnē yic. Koc Nhialic ku thöny Nhialic kek thöny Manh Amääl kek aa reer thīn, ku koc ē Nhialic kek aabi ye aa door. ⁴ Kockā aabi Nhialic aa tiņ ku rin Nhialic abi gät kenhiim tuēņ. ⁵ Abi cien cuöl ē piny ye gen yic. Koc ē rēer thīn aaci bi wic ruel aköl, tedē ke ye many bi piny mer yen wickē. Rin Nhialic yen abi ya ruelden. Aabi rēer thīn ke ye bāny akölriēc ebēn.

Ben ē Jethu

⁶ Go atuuc lek ya, “Kuat kāk ca tiņ ku piņ ke aa yith ebēn. Ku Beny Nhialic yen Weike yāth ē koc kāk Nhialic tiņ gup, yen acā atuönyde tuöc bi kacke nyuöth kāk bi röt looi ye ninkā.” ⁷ Aye Jethu lueel elä, “Dhielkē piņ apath! Yen abö emēn! Koc mit puöth aa koc thek kāk ci lueel athör kēnē yic ebēn!” ⁸ Ee yen Joon yen a ya piņ ku tiēņ kakkā. Tewēn ci yen ke piņ ku tiēņ ke, ke ya gut ŋanhiöl piny yecök ku duöör atuny wēn nyuth yen kakkā. ⁹ Go jal lek ya, “Duk loi kēya! Yen alony cimēndu, ku miethakui koc kāk Nhialic tiņ, ku koc ebēn kāk tö athör yic theek. Dor Nhialic!” ¹⁰ Ku lēk ya, “Duk kāk ci göt athör kāk Nhialic kēnē yic thian tēnē koc, rin ci piny thiök ke thök. ¹¹ Ku koc käreec looi aabi ŋot ke la tuēņ ke looi käreec, ku koc ci wet

21:3Edhe 37:27; Leb 26:11, 12 21:4Ith 25:8; 35:10; 65:19 21:6Ith 55:1 21:72Tha 7:14; Wk 89:26-27

21:10Edhe 40:2 21:12-13Edhe 48:30-35 21:15Edhe 40:3 21:18-21Ith 54:11-12 21:23Ith 60:19-20 21:24Ith 60:3

21:25-26Ith 60:11 21:27Ith 52:1; Edhe 44:9 22:1Edhe 74:1; Dhäk 14:8 22:2Cäk 2:9; Edhe 47:12 22:3Dhäk 14:11

22:5Ith 60:19; Dan 7:18

Jōṅrac gam aabī ṅot loikē këya. Ku kōc ē luui kăpath aabī ya luui kăpath. Ku kōc Nhialic aabī la tuēṅ ke luui Nhialic.”

¹² Aye Jethu lueel ëlä, “Pieṅkē apath ṅen abö ëmēn thiin, ṅen abö ba kōc ben riōp, tēdē ke ṅa tēm kōc awuōc thōṅ kek kë cī ṅek looi thēer wäär. ¹³ Ee ṅen jōk ē cōk ku ṅen thök ē kăṅ.

¹⁴ “Kōc mit gup aa kōc cā alăthken lōok riem Manh Amăäl, rin aabī la yic bīk mīth tim pīir cam, ku aala yic aya bīk la gen Nhialic ē yam. ¹⁵ Kōc tō geu kōu aa kōc pan mac, kōc cī kegup yiēk acuol rin theek kek jōṅrac, kōc năk ē kōc, ku kōc ē jam lueth, ku kōc luui kăk bal aacīi kōṅ la ē gen kēnē yic acin.

¹⁶ “Aye Jethu lueel ëlä, Ṽen acă atuōnydie tooc bī kăkkă ben lek we, wek akuut cī gam. Ṽen ē kuat dhiēnh benyṅaknhom Debit, ee ciēer bak piny ē ruel beei.”

¹⁷ Aye Wēi Nhialic ku kōc Nhialic kek cīt nyan thiak ē Manh Amăäl lueel, “Băk!” Ku kuat raan piṅ ē kēnē adhil lueel aya, “Băk!” Na le raan nek rou ke bö, kuat raan nek rou abī dek piṅ pīir ē path.

Thök ē wël

¹⁸ Ṽen Joon, ṅen alēk kuat raan piṅ ē wet kēnē puōu ëbēn, na le raan juek kēde thīn ka bī Nhialic tuōc kărec cī gōt athör kēnē yic. ¹⁹ Ku na le raan nyeei wet tōk kam wël tō athör wël cī nyuōth ṅen yic, ke Nhialic abī yinyden bī tek ye mīth tim ē pīir yic, ku la gen yam, cī ke gōt athör kēnē yic, nyaai tēnē ye.

²⁰ Ku Jethu raan lēk kōc kăkkă ëbēn aye lueel, “Ṽee-Ṽee! Ṽen abö ëmēn!” Këya, ee tēde. Bäär Beny Jethu!

²¹ Bī dhēēṅ Beny Jethu rēer kek kōc ē Nhialic. Yenakan.